

**SEVENTH LEGISLATIVE ASSEMBLY OF MIZORAM  
( FIRST SESSION )**

**LIST OF BUSINESS**

FOR THIRD SITTING ON WEDNESDAY, THE 18<sup>th</sup> DECEMBER,  
2013  
( Time 10:30 A.M. to 1:00 P.M. and 2:00 P.M. to 4:00 P.M. )

**ELECTION OF DEPUTY SPEAKER**

1. Members to elect Deputy Speaker.

**DISCUSSION ON MOTION OF THANKS**

2. Discussion on Motion of thanks on the Address of the Governor (to be concluded)

NGURTHANZUALA  
Secretary

....

**SPEAKER :** Tin, “roreltute hnenah chuan ‘In thiltih chu ngun taka ngaihtuahin ti rawh u; mihring tana rorel in ni lo va, LALPA tan a ni zawk si a; rorelnaah chuan in hnenah a tel zel a ni. Chuvangin, Lalpa hlau ula, fimkhur takin ti rawh u ; LALPA kan Pathianah chuan khawlohna leh thlei bik neihna leh tham eina te a awm lo a ni,’ a ti a”. II Chronicles 19 : 6-7

Kan zingah Pu Zoram Sangliana, MLA zahawm takin a theih loh thu a rawn sawi a, chu chu House phalna a ngai a, House-in leave of absence kan grant a ni e. Pu Lal Thanzara’n chhuah hma a dil a, chu pawh chu kan phalsak turah ngai ila, House kan inform ni sela. Tin, nimin dar 3 thleng khan Deputy Speaker nomination file-na hun kan hawng a, tah chuan nomination pakhat chauh Pu S.Laldingliana’n a propose Pu R.Lalrinawma hming, chu chu Dr.Ngurdingliana’n a thlawp a, midang chuh tur hming kan hmuh loh avangin kan dan bung 8:5-na angin Pu R.Lalrinawma chu chuhtu awm lo va Deputy Speaker a thlan tlin a ni tih ka puang a ni. Tunah hian khawngaih in kan Leader of the House leh Opposition Group Leader-in kan Deputy Speaker thlan thar kha a thutnaah khawngaih in min hruai sak se. Kan Deputy Speaker thlan thu-ah hian kan House Leader-in sawi duh a neih ka ring a, a nin hun han nei phawt se.

**Pu LAL THANHAWLA, CHIEF MINISTER :** Pu Speaker, Pu R.Lalrinawma, Deputy Speaker a chuh lo va thlan tlin a ni hi lawmawm ka ti a, thinlung takin ka lawmpui a. Ani hi keini ho zingah chuan Law lamah chuan kan expert neih a ni a. Term hmasaah khan Law Commission Chairman-ah kan hotuten an dah a, a thawk tha hle a. Term hmasa kha helai House awm tawhah chuan Legislation te leh dan dinglai obsolete tawh han amend chungchangah te a thawk

tha ber anih ka ring a. Chung zawng zawng rawn initiate-tu chu kan Law Commission Chairman Pu R.Lalrinawma kha a ni a. Vawiinah helaiah nang mi experience nei tha tak thlawp tur che a kan House-in chuhtu awm lo va a thlang hi a lawmawm ka tih rualin ama tan tak pawh thil lawmawm anih ka ring a. House zahawm tak a conduct in kan House hi discipline hle thin mahse dan neuh neuh te leh thil dang dang hriat zau te a lo ngai a, chutiang kawngah pawh chuan puitu tha tak i nei a ni tih ka hriat avangin lawmawm ka ti a, in chungah rinna kan nghat a. He House zahawmna hi tun hma ang bawkin kengkawh leh turin kan beisei che u a. Chumi atan chuan kei leh ka thawhpuite leh kan hotuten kan thlawp tlat dawn che u a ni tih ka sawi duh a. Tin, a zahawmna leh discipline tha taka keng kawh zel tur pawhin kan beisei che u a. Chumi zawng zawng atan he House hi in conduct-na atan leh a zahawmna maintain tura in hmalakna turah kan support che u a ni tih kan hriattir che u a ni. Ka lawm e.

\* Speech not corrected.

**SPEAKER** : Pu Vanlalzawma.

**Pu VANLALZAWMA** : Pu Speaker, tukinah Deputy Speaker thar kan nei hi a lawmawm hlein ka hria a a mimal takin leh keini Opposition Group aiawhin i chungah leh a rawn vawrhchhuaktu kan Legislature Party, kan House Leader zahawm tak leh a thawhpuite chungah lawmthu ka sawi duh a. Chutih rual chuan hmanniah Speaker thar kan neih tuma ka sawi ang khan thawhhona hnuaiah tha takin min kaihruai ang tih ka ring a. Kan ngaihthlak tawh ang khan ani hi mithiam a ni a. Law lamah phei chuan ani

aia thiam an awm lovang ti ila kan tisual awm love. Tin, hei mimal tak pawh kan sawi duh a chu Law Commission Chairman MLA zahawm tak a nih lai khan sawlaih kan bial chhung Aizawl West-III ah a khawsa a, thenawm khawveng te pawhin an tangkaipui hle niin ka hria a, tunah hian engtin nge a awm chiah ka hre lo nachungin sawlaih a bialchhungah awm zui turah te pawh han ngai ila. Chungah te chuan a bial enkawlnaah te pawh min puitu tur leh tangkai thei tak tur a ni te pawhin ka hria a. A mimal takin kei ka lawm hle a. Theihtawpin opposition lam atang pawhin thawhpui chhoh hi thain ka hria a ni. Amah pawh min hrethiam sela kan dinhmunte hmanna kan sawi tawh ang khan member thar te te te kan ni hlawm a, helaiah hian kan hriat tawh loh leh a dan lama kan hriat tawh loh te pawh min finchhuah zel turin vawiinah kan ngen nghal duh bawh a ni. Ka lawm e.

**SPEAKER** : Kan duh tawh mai ang a, sawi duh dang pawh in awm mai thei a. Amah pawn a sawi duh ang e. Pu Lalrinawma i sawm ang u.

**Pu R. LALRINAWMA, DEPUTY SPEAKER** : Pu Speaker, hei vawiinah Deputy Speaker dinhmun pawimawh takah chuhtu awm lova he dinhmun ka chelh tur hi ka lawm em em a. House Leader leh member zawng zawngte chungah lawmthu ka sawi a. Dan lamah te tunah kan phulohvin min fak a, amaherawhchu, inzir ngai tam tak awm a ni a. Chungah chuan min finchhuah a thurawnte min pe a min tawiawm zel turin Member zawng zawngte ka sawm a che u. Ka lawm e.

**SPEAKER** : Theihngihl a awm tawh em lovang chu maw. Niminah khanin a puluttu leh a seconder chungchangah khan tlema confusion a awm deuh hlek a. Kha kha nakin zelah kan Dan Bu phek 10-na ti mai ang, a bung leh chang aiin a phek kha chhiar a awl zawk ang a. Tahkhanin a nin a second a chair atanga tih kha a tawk mai. A second-tu khan dinga ka second e tih kher loh pawh khan a theih a ni tih he House hian min hriatpui sela a tha ang e.

Tunah chuan nimina Motion kan move tawh kha kan la tawh ang a. A hun tur hi mipakhatin minute 5 ti mai ila House duh dan a ni em le ? Anih leh minute 5 ti mai ang aw.

**Pu LALRUATKIMA** : Pu Speaker, mi thar te te ten maiden speech kan neih dawn avangin khawngaih takin minute 10 min pe thei lawm ni.

**SPEAKER** : Helamin minute 10 an rawt a, kan pawmpui mai em ?

**Pu LAL THANHAWLA, CHIEF MINISTER** : Pu Speaker, Governor address hi a tawi khawp mai a, han tlak duahpui tur a awmin ka hre lo. Chuvangin, minute nga i rawt kha a tha mai kan ti keini chuan.

**SPEAKER** : House ngaihndan hi kan la tlangpui thin a, minute 5-ah inkhungkhawm tum ila, thusawi thiam thlankhawm kan ni bawk a, minute

5-ah sawi zawh i tum ang u. Tunah hian a motion neitu Pu Chalrosanga sawihona tan turin i ko ang u.

**Pu CHALROSANGA RALTE** : Pu Speaker, ka lawm e. Vawiina Mizoram rorelna sangbera thusawi thei tur dinhmuna ka rawn ding hi a hmasaberin Pathian hnenah lawmthu ka sawi a. Tin, he dinhmuna ka awm theihna, rinna ka chungah min nghattute, kan party hotute leh Lunglei West bial mipuite chungah lawmthu ka sawi bawka ni.

Nimin khan kan Governor zahawm takin thil chhinchhiah tlak tak tak a rawn sawi a, lawmthu sawina tlak a niin ka hria.

Pu Speaker, Governor zahawm takin House zahawmna kenkawh chungchang a hmasa bera a rawn sawite kha a lawmawm hlein ka hria a. Zoram rorelna sangbera kan thusawi honaah te kan inzah tawn a, ram tana hlawkna leh hmasawna a nih theih ngeina tura kan Governor zahawm takin thu a rawn sawi te kha a lawmawm hlein ka hria.

Mizoram General Election neih zawh takah khan Congress party chu chak takin mipuiin rorel turin min hlangkai leh a. Mizoram mipuite hian Congress sorkar hnathawhah hian rinna an la nghat a ni tih te kan Governor khan a sawi a, a lawmawm hlein ka hria a. Mipuiin he sorkarah hian beiseina sang tak an la nei a, he beiseina hi kan tihhlawhtlin ngei ka beisei bawka ni.

Kumin inthlan hi Election Commission of India khan khauh takin venhimna kawngah leh endikna lamah pawh khan hma a rawn lain kan hre vek a. Candidate te pawh kan fimkhur hlein ka hria. Hemi

chungchangah hian kan sorkar hotute, a te ber atanga a lian ber tena an thawhrimna zawng zawng kan ngaihtuah hian an fakawm hlein ka hria, Zoram thil thlengah chuan chhinchhiah tlak niin ka hria a ni.

Inthlanna muanawm neih theih nan hian hma latu zahawm tak tak te, kan kohhran hrang hrangte, kan NGO te leh MPF te hnathawh hi a fakawm hlein ka hre bawk a ni. Democracy ramah chuan mipuiin vote an thlak thin a, vote a tlak tam chuan ram a ralmuang niin kan hre thin a ni. Tuntum inthlanah khan vote tla 83.41% lai niin Mizoram record a tling thei a ni. Hei hi a chhan chu, kan House leader Pu Lal Thanhawl kaihhruaiah hian mipui an thla a muang a, chuvang chuan hetiang record hi kan siam thei a ni, a lawmawm hlein ka hria.

Kan sorkar Flagship Programme Pu Speaker, han sawi lawk ila. Niminah khan kan Governor khan a sawi a, kan chhunzawm leh dawn a tih kha a lawmawm hlein ka hria a. Inthlan lai khan party dangte khan kan sorkar chuan kan chhunzawm ang te an ti a, amaherawhchu, vawiinah chuan a hringtu, a duangtu ngeiin kan sem chhunzawm leh thei tur hi a lawmawm hlein ka hria a. Pu Speaker, i phalnain ka'n chhiar lawk anga. NLUP training neih a ni a, hemi tum a Reseacher Professor pakhat paper present hian ka beng a verh hle. 'Khawvel ram hrang hrang kan zirchiannaah NLUP aia eizawnaah, hmalaknaah chhungkaw tin thleng kim hi a awm lo tih hi kan hmuchhuak a ni,' a ti hial mai hi a lawmawm hlein ka hria a ni.

Sports thalai zingah hian eizawn nan an hmang mek tih chu hai rual a ni tawh love. Kan Governor thusawiah khan, "Sports sector chu ngaihpawimawh (priority) a dah a ni e", tiin a sawi hi thalaite tan chuan thil lawmawm tak a niin

ka hria a. Thalaite khawvel kan tih hi Zoram dung leh vangah infiamna lamah hmasawna a zuanin a zuang nasa hle mai a, Sports Discipline hrang hrangah infrastructure thahnem tak siam tawh niin siam mek zel a la ni bawka. Congress sorkarah hian thalaite hian future tha tak an nei a ni tih a rawn sawi te kha a lawmawm hlein ka hria.

Tin, Pu Speaker, Power chungchang intodelhna kawngah sorkarin hma a la mek tih a sawi kha thu lawmawm tak a ni tih ka hria a. Tuirial Hydel Project Mega Watt 60 Ministry hmasa zawka hluihlawn tawh Congress sorkar tirha a chhonzawm leh te kha nakum lawkah he sorkar chak tak hmalaknain commission theih mai turin a awm a. Tin, kan Governor zahawm takin a rawn tarlan Tuivai Hydel Project Mega Watt 210 pechhuak thei tur pawh Central lamin a approve tawh tih te pawh a rawn sawi kha a lawmawm hlein ka hria a. Heng project pahnih te hian Mizoram kawlpheha mamawh chu a phuhruk dawn a, tin heng project pahnih piah lamah project hrang hrang kan hotuten an kalpui mek te State sorkarin nakin lawkah a hlawhtlin hunah revenue lak nan te pawh surplus energy kan neih te hi kan hralhchhuah theihna tura hma kan la mek te hi a, a lawmawm hlein ka hria.

Inkalpawhna hi kan sorkar chuan hmasawna rahbi pawimawh hmasa ber pakhat a ngai tlat a, hei vang hian Mizoram hmun hrang hrang inkalpawhna hna thawh mek thawh chhonzawm zel a ni hi a lawmawm hlein ka hre bawka ni.

Pu Speaker, a tawpna atan, he sorkar chakna thahrui leh mipuiin rin a hlawh berna pakhat chu dikna, rinawmna leh eirutute do ngamna a ni a, chuvangin sorkar rin tlak leh chak hmalakna huaisen leh thianghlim neih chhonzawm a duh thu Governor zahawm takin a sawilang hi alawmawm ka ti hle



a ni. Mizoram mipui hnenah hian langtlang sorkar hi engti kawng zawng pawhin kan pe tur a ni tih kan Governor zahawm tak khan he House-ah hian a sawi a, member zahawm takte hian lawmthu sawina tlakah an ngai a, lawmthu sawina motion ka putluh hi min pawmpui vek turin ka rawn sawm a che u. Ka lawm e, Pu Speaker.

**SPEAKER** : Midang an din leh hmain khawngaihin Leader of the House leh Opposition Group Leader te kha chu hun ka pe tam deuh dawn a motion neitu nen kha kha minute 10 ve veah ti leh ila, kan tihdan pangngai a ni, kha kha, midang sawi duh in awm em ? Pu K.Sangthuama.

**Pu K. SANGTHUAMA** : Pu Speaker, hei vawiinah hian kum 5 lai helai House-ah hian awm lovin Pathian leh mipuite zarah he House-ah ka lo thu leh thei hi Pathian leh ka bial mipuite hnenah a hmasain lawmthu ka sawi duh a. Paruk kan ni a, 1998 kha kan pha chiah mai opposition ah khan kan ni tawh bawk a, kha nen khan a inang viau a, chuvangin keini ho hi oppsition tangkai tak nih kan tum dawn a, House-a roreltute a chhelam zawnga sawi tum hrim hrim a kha opposition hnathawh tur chhe zawnga va sawi tum a kha kan tih tur pawh a ni lovang a, a tha laiah chuan theih tawp kan chhuah anga. Kan tang tlang a nga, a thalo lai a awm a nih chuan theih tawp chhuahin a thatna tur ngaihtuahin kan sawisel bawk anga. Chuvang chuan he House hi a zahawmna kan vawng nung zel anga, tiang chuan paruk chauh nimah ila opposition tangkai tak nih kan tum dawn a ni tih hi ka sawi duh a. Hei, kan Governor zahawm tak thu sawi hi tam tak a ni lova point 16 chauh a ni a.

A hmasa berah chuan number 5-na NLUP chungchang hi tawi tein ka sawi duh a. NLUP hi a tir atang pawh khan kan sawichhe ngawr ngawr lova, keini

hian a policy hi chu tha kan ti a. Amaherawhchu a thawktute hian NLUP hi hmang tangkai sela tih kan duh a, chu chu kan rilrua lian ber a ni a.

Vawiinah pawh hian kan sorkhar thar hian NLUP hi pek loh Mizoramah tam tak an la awm a, pawisate a awm bawk a Mizoramah pek chhunzawm turah kan ngai a, la hmulo te hi theihtawp chhuaha pek chhunzawm zel ni thei sela tih kha vawiinah hian ka'n sawi duh bawk a. Tin, pakhat lehah chuan Food Security hi a pawimawh em em mai a, kan state-ah pawh hian tih ve kan tum dawn niin alanga, amaherawh chu helaiah hian fimkhur deuh hlek chu a ngai mai awm mange aw ka ti a. Cheng thuma buhfai kan pek chuan heta tan hian nuai sarh singruk vel hi ruahman niawm takin ka hria a, hei hi chengthuma kan pek dawn chuan a subsidy a ngai tam viau dawn a, chubakah a mipui mimirin kan ei tur a tova kan lei a ngai dawn bawk a, kan state sawrkar hian kan tlin angemaw chu aw ka ti a, chuti chung chuan central sawrkar hian min tih tir dawn niawm tak a ni a. Hengah pawh hian kan sawrkar hian ngun takin ngaihtuah sela, mipui tan chuan a tha a, chumi rual chuan ngun taka kan ngaihtuah hi chu a ngai awm mange kan ti a.

Tin, a dang lehah chuan kawng hi a pawimawh em em mai a, communication hi a that tawh loh chuan ramah hian harsatna kan tawh thin a. Chutih rual chuan tawi tein, University kawng hi a chhe em em mai a, ka bialah khuan hei hi ka'n zawt chiang a, second instalment hi pek loh niin an sawi a chuangin second instalment hi pe thuai turin kan sawrkar hian central lam ah theihtawp chhuahin bei sela, tichuan fur hma hian khulai University kawng khu tha taka ti thei turin second instalment hi pe thuai turin kan sawrkar hian theihtawp chhuahin nawr sela a thain ka ring a.

Tin, kan contractor-te hian sum an hmuh loh chuan mahni suma hna thawh hi an tum mang lo emaw ni aw ka ti a. Ani pawh khuan sum ka neilo a ti a, a dik ang, amaherawh chu contractor-te kum 20, 30 kan thawh lai hian sorkar pawisa ngawr ngawr hi kan ring lova, kan sumin kan thawk thin a, khami kan suma kan lo thawh kha a hnuah kan thawh ang ang khan sawrkar in bill min pe thin a ni a. Tunlaia kan contract hna thawh danah hi chuan sawrkar a advance lak a, kha mi ngawt a kha kan ring ta deuh emaw ni chu aw a tih theih deuh va. Heng pawh hi sawrkarin a enpui a ngai awm mange ka ti a, chuvang chuan furpui hmain a changtu ni bawk, kan Chief Minister hian ngun takin en deuh sela a tha mange ka ti deuhva.

Tin, pakhat lehah chuan hei Disaster Mangangement hi kan sawrkar hian ngun thluk taka kalpui lehzuai se tih kan ngen duh leh bawk a. A chhan chu Mizoramah chhiatna rapthlak tak tak a thleng ve ta fova, henga chhiat kan han tawh tawhah hian duhanga hmalak chak a har thin a, chumi hmaa kan ram chheng chhe tak hi zir chian lehzuai tun aia chak a hma la turin kan sawrkar hi ka ngen duh bawk a ni.

Tin, Education chungchangah hian ziaik leh chhiar thiam chungchangah hian zaa za nih tumna a rawn sawi bawk a, kan Governor zahawm tak hian. Hei hi a dik chiah mai a, amaherawh chu a dik chiah rual hian Adult Education Wing hi duh ai hian kan tichak tawk lova tunhma atangin keini sorkar ve lai pawh khan a ni thova, hei hi hma la chak deuh hlek ila kan ram hi ziaik leh chhiara za a za nih hi hma a har loin ka hria. Chuvangin, Education changtute kan ngen nghal duh bawk a, Education-ah

hian rilru lo pe selangin, India rama ziaak leh chhiar thiam zaa za ni thei mai tur kan ni a.

Tin, Transport chungchangah te pawh hian theihtawp chhuaha tan kan lak a ngai a. Highway chungchangah te pawh hian Kawnpui leh Sairang inkar kawng te pawh hi kan bei rei tawh hle mai a. Pu Speaker, kan Governor thusawi tamlo teah hianin thil tangkai tak tak tur a rawn sawi a, heng a thil sawi hi kan sorkarin theihtawp chhuaha a bawhzui a, a ennawn chhoh hi a tha ang a. Chuvangin, nimina kan Governor-in thu a sawi hi a tha hlein ka hria a. Engpawh nise, kan sorkarin ngaipawimawha a bawhzui chak phawt chuan heta tang pawh hian thil tam tak tih tur a awm a ni tih hi ka sawi duh a ni. Chuvangin, kan Governor thusawi hi lawm taka kan zavaia pass thei turin House pawh ka ngen nghal duh a ni, ka lawm e.

\* Speech not corrected.

**SPEAKER** : Sawi duh dang in awm tawhlo em ni ?

**Pu LALTHANLIANA** : Pu Speaker, point hnih lek kan Governor thusawi atang khan lawmthu sawi duh ka nei a. Pakhatnaah chuan No. 8-na hi a ni a. Keini party hi chuanin Hydrel Project han tih vel hi chu kan beng hi kan tun deuh hra zel a nia, tunah hian energy han tih hian electric energy turah ka ngai a, lawmawm ka ti khawp mai a, liability gap funding-ah zaa 19.42 hmu tura tih a ni te, tin he project hi approved tawh anih thu te kan hriat hianin lawmawm ka ti a, a hlawhtlinna hi hmuh ka nghakhlel khawp mai a, he sorkar hian a ngaihpaawimawh avangin a lawmawm ka ti.

Tin, No. 13-na hi ka bialchhung Ramhlun leh Laipuitlang a khawih a, leikhi te, leimin te siamna tur atan hianin vaibelchhe 555.55 a awm tih hi a ropui ka ti hle mai, a lawmawm ka ti. Hemi siamthatna tur atan hian ka hrethiamlo nge phe chu ka hre lova, a inziak ang ang hian kan sawi ve mai a ni a. Ka bialchhung saw zoram mipui nghawng thil thleng anih avangin he sum leh pai awmsa hmang hian hma min laksak turin ka ngen che u a. Tin, a bik takin Ramhlun Sports Complex-ah sawn in leh lo 40 vel chan a ni a, chumi tur atan chuanin ministry hmasaah khan ka hriat sual loh chuanin vaibelchhe 5.5 kha sanction a ni a, tah khan ramte pawh lei a ni a, an awmna tur In leh Lo chante tan hmalak mek a ni tih te pawh ka hria a, sorkar pawh a tul khawp mai a, an committee deuh reng tih te ka hria a ka lawm khawp mai a. Chumi rual ruala ka'n sawi duh chu helaiah hianin thingtlang leh hmun hrang hrang atanga rawn pem lut Ramhlun Sports Complex chhungah veng dang pawh nei tawh chuang lo, khua pawh nei tawh chuang lo Aizawl hi khua anga ngai Ramhlun Sports Complex pawh saw khua a ngai, mahse In leh Lo nei chiah si lo te saw In leh Lo hi a pek ve theih lawm ni tih ka rawn dil sak nghal duh a, chu chu kan sorkarina min ngaihtuah sak hi ka duh khawp mai a, chu chu ka sawi duh a.

Hetiang ang ngaihsak zuina te, tin, post disaster management chauh ni lo pre-disaster management chungchangah pawh a pawimawh zia an realized tawh a ni tih thu te Governor speech atangin kan hria a, a lawmawm ka ti a, a thlamuan thlak ka ti a. Helai chauh pawh nilo Ramhlun Sports Complex te, Ramhlun Vengthar chauh nilo Laipuitlang tuikhuah te pawh khi a khi niin an sawi a, khang kha min enchian sak tur leh tin, khilai kawng cut tur, tlang cut tur tih Ministry hmasa khanin sawi

a ni tawh a, kan campaign lai pawhin kan sawi a, cut loh ala ni a khing te khi. Tin, a thlang kawng zut mam leh siamthat te pawh la tihfel fai loh a ni te khi, hei sum hi a awm avang hianin a thlamuan thlak ka ti a lawmthu ka sawi rualin fur a ni leh hman mai ang tih ka hlau a, chhiat belh zel a thlen hmain khawngaih taka hma min lak sak turin ka ngen bawh che u a, lawmthu sawi pahin.

A tawp nan ka thiante pawhin an sawi ve tho avangin, ka bial mipuite khawngaihna ka dawn avangin MLA kan ni ve ta ringawt mai hi ka lawm em em a ni tih ka bial mipuite hriatah ka sawi duh bawh a ni e, ka lawm e.

\* Speech not corrected

**SPEAKER** : Dr. K. Beichhua.

**Dr. K. BEICHHUA** : Pu Speaker leh House Leader zahawm tak leh Member zahawm tak tak te a hmasain Pathian leh Saiha bial mipuite duhsakna zara helai House zahawm taka ding thei a ka awm hi lawmthu ka sawi a. Tin, Pu Speaker, vawiin hi a lawmawm hle in ka hria a Speaker senior tak leh House Leader senior tak hnenah hian a hmasain lawmthu ka sawi duh a ni. Mizoram kum tam tak in lo enkawl tawh na leh min lo kaihhruai tawhnaah in zahawm ka ti in ropui ka ti a. Chuvang chuan a bik takin kan Speaker zahawm tak leh kan House Leader zahawm tak chungah hian lawmthu ka sawi hmasa a, hei hi nangmahni hmalakna leh hnathawh tawhna zarah keini thangthar politician-ten vawiinah nangmahni kaihhruaina hnuaiyah in kum ngaihtuah chuan chawhnu her ani tawh a, chutah vawiinah hian nangmahni kaihhruainain he House ah hian keini thangthar politician te

chuan nasa takin kan inzir dawn tih ka hriat avangin in hnenah lawmthu ka sawi a, Pathianin finna leh remhriatnain thuam che u sela tih duhsakna ka hlan baw k che u a ni.

Nimina kan Governor zahawm tak thusawi atanga lawmawm ka tih em em point khatnaah chuan 5-na NLUP flagship kha chhunzawm ani dawn a, khatah khan keini MNF pawh hi min telh ve hram ula tih kha ka sawi duh baw k a. In lo telh tawh anih pawhin la telh loh te pawh min telh sak zel ula tih kha ka sawi duh baw k a.

Tin, hei vawiinah Serchhip atanga piah lama opposition member awm chhun chu keimah chauh hi ka ni, churang chuan engpawhnise Member zahawm tak tak ten opposition member ringawt anga min en mai lova fapa mal duata min duat turin ngenna ka siam duh baw k a ni. Tin hetah 9-na ah hian re-surfacing work of 129 kms tih kha a ni a, hei hi a bik takin keini Saiha bial saw chhim tawpa awm kan nia kalkawng dinhmun kan ngaihtuah sawn a lungchhiat thlak hle thinin ka hria a ni, kum thum kum li kaltaah khan Kawlchaw bula leimin chhete saw tihfai hleihtheih loh in a awm a, fur apiangin kan life line saw a chat thin a ni, saw sawn harsatna nasa takin min siam sak thin a 129 kms re-surface turah hian keini hi kan tel angem tih hi ngaihtuahna nasa takin keimahah a awm a ni.

Engpawh nise, chhimtawp a awm kan nihna angin kan hotuten priority-ah min lo dah sak se. Sawlai kan life line saw furah chuan engtia han tih hleih theih a ni mang si lova. Engpawhnisela thalah ngei hian kan hotute hian hma min lak sak ulang tih ka'n sawi duh baw k a. Tin, kawng te a lo chhiat a hla taka

awm kan nih avangin dam loh nikhua leh in refer leh eng emawah hian harsatna tam tak kan tawk a. Chuvang chuan kan Damdawi in mawlh saw ka rilrua ka vei em em a ni thin a ni. Aizawl, Lunglei, Saiha Damdawi in hi a rual a din vek a ni a. Tahchuan, keini tuna Saiha Civil Hospital saw chu a dinhmun dik tak han sawi chuan a thing saw kan her kan her tawh maiin a lang a ni. Chuvang chuan, kan inzaina room te saw tunlai khawvela mihring inzaina room atan chuan a chi tawh lova. Kan nau neihna te saw a hlui em em tawh mai a. Tin, a Damdawi in hrim hrim saw a hlui tawh a. Tin, ek in te pawh saw thal ah te phei chuan tui awm loh avangin ek hleih theih a ni lova. Damdawi inah saw'n dam reng in lut ta ila, ni thum, ni li velah chuan typhoid veiin kan chhuah mai ka ring thin a ni. Chuvang chuan, saw saw khawngaih takin kan hotute hian priority-ah min dah sak hram ula ka duh a.

Tin, chu mai a ni lo. Saiha saw infant mortality rate sang ber kan nihna hi kum hnih/thum a ni tawh. Chutah chuan, nausen thi tamna ber District anihna ang sawn hma pawh saw special deuh taka min lak sak hi a awm viauin ka hria a. Chulai chuan pediatrician kan nei a, naupang specialist, chu chu chutiang dinhmun kan nih lai ngawih ngawihin min lak chhuah sak ta a. Tunah sawn pediatrician nei lovin kan awm a ni. Chu lovah chuan gynaecologist, hmeichhe lama specialist kan tih hi kan nei lo bawk a. Nausen thih tamna ber District a, gynaecologist leh pediatrician neih loh hi chu a inhmeh lo viauin ka hria a. Theih phei chu nise, chumi pahnih piah lamah neonatologist pawh hi min dah sak thei ula tih kha ka sawi duh bawk a.

Tin, kalkawng chungchangah pawh khan Kawlchaw bul mai ni lovin a khaw kalkawng inkal pawhna hrim hrim saw a chhe em em tawh mai a. A zatve saw chu furah chuan chirhdiak vek a ni. Furah chuan motor tam tak a tang thin a.



Nakum lamah chuan siamthat a nih loh pheih chuan mihringte pawh hi kan tan ka ring a ni. Chuvang chuan, sawlai saw engpawhnise, hotute hian rilru ah min neih sak ula. Priority ah min dah sak ula tih saw ka sawi duh bawk a.

Tin, chu lovah tui in tur saw kan tlachham viau a. Kan Sorkar hmasa a, kan Minister zahawm tak pawhin a theihna zawng zawng chhuahin hma a la a, hma a lakna pawh la kal mek a ni tih kan hria, a hma lakna pawh kan fak. Chutih rual rual in, tuna kan tui lakna dinhmun saw ngaihtuahin, thalah chuan a kang chat deuh ti tih a. furah chuan kan khuahna lai saw lei vung hian a chhilh zel a ni. Kan khuahna san poh leh lei vung kan khuap chhah a ni ringawt mai dawn a ni. Chuvang chuan, tui in tur hnianghnar kan neih theih nan tun Sorkar thar hian khawngaih takin Chhim tawp kan nihna ang sawn hma min lak sak turin, priority ah min neih sak ula tih kha ka sawi duh bawk a. Aw le, Pu Speaker, vawiina helai hun nei thei a ka awm hi ka lawm a. Nichin-a, ka sawi tawh ang khan, opposition member a min en mai lova, fapa mal ang a, Serchhip piah lam MNF a tling awm chhun ka ni a, fapa mal ang a min en tlat turin a tawp berah Pu Speaker, member zahawm tak tak te ka ngen leh bawk a ni. Ka lawm e.

\*Speech not corrected.

**SPEAKER** : Pu T T Zothansanga.

**Pu T.T. ZOTHANSANGA** : Pu Speaker, ka lawm e. A hmasain Champhai North Bial chhung mipuiten he House chhunga ka luh theih nana hma an lak na-ah lawmthu ka sawi hmasa duh a. Tin, vawiinah hian kum 5 zet mai helaiia kan lo thutpui tawh, an hmel kan han hmu ta lo te hi ka rilru a kim lo ka ti hle mai a, kan hre reng a. Chutih rualin member duhawm tak tak te hei vawiinah

kan han awm leh a. Tun term hi tluang takin kan kal chho thei turah ka'n ngai a. Chu chu ka'n sawi hmasa duh a.

Tin, Pu Speaker, kan thupuaia kan luh hmain thil pakhat han sawi lawk ka'n duh a. Hei MDA pawh hian Legislature Party an siam a hman ni khan. Chuta an siamnaah chuan kha ka hma ami fapa mal duat tak maia duat tura rawn sawitu thil sawi kha ka rilruah hian a rawn awm a, Zozam Times-ah khan a rawn lang a, “Assembly chhung leh pawnah theih tawp kan chhuah ang , House-ah chinghne zinga beram dah ang kan ni tawh ang a,” a ti a. Tute hi nge chinghnia a tihte hi ni ang tih hriat ka chak khawp mai a. Chinghne zinga beram dah ang a lo ni dawn reng em ni? Kha kha Pu Speaker rem i tih chuan nakinah sawifiah theih kha tha ka ti khawp mai a. He House-ah kher hian chinghnia kha han sawifiah sela, kan lo ni palh a nih chuan ngaihdamte pawh dil thain ka hria a, mipuitena duh taka an thlan kan ni a, kha kha a Ethics lo riauin ka hria a, he House-ah ngaihdam a dil duh lo a nih pawhin Ethics Committee lama bawhzui chi niin kan hria. Tin, nimin lawkah Exodus Day an lawm a, chutah chuan, “A tul chuan vangvat kan kai leh ang,” an ti a. Kha kha engnge a awm zia kha min han sawi fiahsak se Group Leader khan, ka duh khawp mai a, kha kha kan point a ka luh hmain ka sawi hmasa duh a ni.

Pu Speaker hei tun kan sorkar kal ta kha a lawmawm khawp mai a, tunah hian kan han chhunzawm leh dawn a ni a. Hei ka rilrua rawn awm Governor thu sawiah hian, point No.14-ah hian, “My government will continue to take strong and bold initiatives to usher in clean, efficient and responsive administration,” a rawn ti a. Departmental enquiry leh ACB-in a chhui ang chi leh Departmental proceedings-in a chhui ang chite kha, tun term kal taah khan sorkar hnathawk 947 zet hnenah khan departmental proceedings kha an lo draw tawh a, chungah chuan

case 206 zet mai kha corruption kaihhnawih kha a lo ni a. Tin, corruption case kha 210 lai mai kha a tawp an lo thlenpui tawh a ni. Hei hi ropui ka ti khawp mai a, Zoram hi sualna leh chhiatna chitin rengin a khat niin kan mithiamte leh thu sawituten an lo sawi tawh thin a. Chutianga huaisen tak maia hma an han late hi lawmawm kan ti a, mipui hnena han tlang zarh han tlang zarh hi a rem lo va. Amaherawhchu kan sorkar hian Zoram Kristian ramah hian sorkar tha tak kan neih theihna turin sorkar lama mi hnawksakte leh a ni lo zawnga lo che ang chite hi chu a dap a, a vai reng a. He mi avang hian kan ram hian hmasawna kawngah ke a pen mek reng a ni tih kan hriat a tha a, kan sorkar huaisenna hi lawmawm ka ti a ni.

Tin, No 13-naah khanin Disaster Management chung chang thute kha arawn sawi a. Disaster lamah hian Disaster Prone area kan ni a, helaiah kan sorkarin chak taka hma an la chho hi lawmawm ka ti a. Champhaiah pawh leimin kan nei a, kum tawp lam a ni a, kan lo buaipui hman tak vak loh avang khan, karawn ti chho leh zel dawn a ni a. Khi laiah in 10 chhuang lai mai area lei a han khi tuar mai a, khitiang kan han la chho turte kan han hriat hian he laia Governor thu sawi hi lawmawm ka ti a. chu chu ka rilrua awm kan sawi hmasa lawk ni sela.

Tin, kan sorkar hian state dang kan phak lohna zirna lamah hma an la hi lawmawm ka ti a. Hei zirlai tam tak hmun dangah an kal hum hum a, zirtirtute pawhin mahni sikulah fate luhtir duh lovin hmun dang kan pan thin a ni a. Hetiang karah kan college-te kan sorkarin an tuam hlawm chho va, development an ti chho zelte hi ropui ka ti a, Champhai bikah pawh hei vaibelchhe 9.51 tunah khian kan sa a, tunah hian kan zo tep tawh a. Kan sorkarin hma a lo lak tawhna leh hma lak a tum zel dan kan hmuh hian lawmawm ka ti a ni.

Tin, Pu speaker, connectivity chungchang kan sorkarin a ngai pawimawh hi lawmawm ka ti a. Champhai lamin sorkar tha kan tehna fung ber tura chu kawng tha hi a ni. Tun hmain Chief Minister-in min bial thin a, kawng tha kan duh em em thin a, kan han thlen thin a. Amaherawhchu, “Champhai bial chauh ka ni lo, Mizoram bial ka ni,” a ti a, Champhai lamin kan dawn tur ang kan dawng lo thin niin kan hria a. Vanneihthlak takin tun kum nga chhung sorkar khanin a duh angin hma nasa takin an la a, a pawisa pawh la thleng chiah rih lo mahse, Champhai khawpui tan ringawt pawh cheng nuaih 250 te min han dah sak ang chite, tin, Khawzawl leh Rabung tan vaibelchhe 6 dah tih ang te, Hmunhmeltha kawnga vaibelchhe 1.5 min han dah sak tih ang chi te, khatiang kha Zoram hmun hrang hrangah hian a awm nual tih ka hria a, sorkarin hetiang road development atana hma an la hi ropui ka ti a, a chhonzawm zel tur thu Governorin an sawi phei hi chuan lawmawm ka ti leh zual a ni, tih kha kan sawi duh a ni.

Tin, thalaite khawvelah hian Sports bungrua hi kan mamawh khawp mai a, sports infrastructure lam hi. Champhai Chhangphut field kan field ropui bera kan neihah pawh vaibelchhe 4.5 in tunah hnim hring kan phah dup dup mai dawn a, tunah hian an buaipui reng a, tin, chutih laiin Zotlangah pawh khian vaibelchhe 20 chuanga hma an han lakna te khi ropui ka ti a. He kan sorkar hi a ropui ka ti a.

Tin, chubakah a tawp berah chuan buh leh bala kan lo intodelh theih nana National Food security hnuaiah Tractor leh Power Tiller an han semte kha lawmawm ka ti a. Lawi vulh kan peih tawh lova, Bawng vulh kan peih tawh lo va, leilet nei kan ni a, khatiang kha kan sorkarin a han chhonzawm zel tur hi a lawmawm ka ti a. Chuvangin, vawiinah Governor-in hetiang tha tak maia thu a rawn sawi hi ka thlawp a ni.

Ka lawm e.

**SPEAKER** : An awm tawh loh chuan Opposition Group Leader kan sawm e. Pu Ruatkima.

**Pu LALRUATKIMA** : Pu Speaker, ka lawm e. Vawiinah Mizoram rorelna sang ber thutkhawmnaah maiden speech han sawi ve tura hun tha min pe tu Pathian hnenah lawmthu ka sawi a. Tin, kan party hruaitute leh a bik takin ka bial Aizawl West-II mipuite chungah lawmthu kan sawi hmasa a ni. Ka bial Aizawl West-II hi kan vannei hle mai a, Mizoram khawvel record kan siamin ka hria a. Tunah hian MLA pariat kan awm a, chung zinga pasarih chu ruling party kan ni leh nghal a. Chuvang chuan, opposition bial mah ni ila development ah chuan min duhsakrawn dawn niin ka hria a, an chungah lawmthu kan sawi hmasa a ni. Nimin lamah kan Governor zahawm tak thusawi kan ngaithla a, nizan lamah te kan han zirchiang a, Election felfai tak kan neih thu te kan hria a. A bik takin a hlawhtlinna atana hnathawktu zawng zawng Kohhranho te, NGO leh MPF te chungah lawmthu kan sawi duh a.

Chutihlai chuan, politics a inchirthehna nge ni? Party pakhat campaign laiin hel thawhpui an awm tih chungchang a ri viau a. Mipui ten thudik kan hriat ngei theihna turin thuneitu lam te pawn an chhuichian a tul tak meuh meuhin ka hria a ni. Tin, sorkar hnathawk leh Mizoram pawna kan Police IR Bn. te leh Election duty a kalchhuak te mi engemaw zatin vote an thlak thei lo kha pawika ti hle a. Tun hnuah thleng tawh lo se thain ka hria. Tin, vote chhiar chung rei lutuk te, Aizawl South-I bialah te, Lawngtlai East bialah te, re-poll ngai leh te kha a pawitak zet zetin ka hria a ni. Tin, vawiin thleng hian vote chhiar tak loh Bungmun, Hachhek bialah te, Ugudasuri, South Tuichawng bialah te, vote vawiin

ni thlengin chhiar loh a ni a, kan chhiar thei ta lova. Mi tam takin EVM an lo sawisel thin kha a dik mai a ni awm mange aw tihte ka ngaihtuahna ah chuan a awm ani. Khang vote chhiar lohte kha vote sang chuang zet a awm a ni. Election Commission-in chhiar loh mai nise, an tling tho ve a ti a. Amaherawh chu, mipuiten kan zalenna a kan duhthlanna kha Zoram khawvel hian a hre ta lo a ni. Chuvang chuan, heng ang zawng zawngah hian tan kan lak a tul a. Election chhungin inrukbona te a thleng a, silaia inkahna te a thleng a. Chungte chu kan dinhmun a ni a. Tunah hian kan Mizo tlangval pahnih leh Airtel company hnathawk pakhat te helho kutah an la awm mek niin ka hria a. Chuvangin, Law and Order kenkawh kawngah tan kan lak a ngai hle mai, Election muanawm leh zalen kan nei han tih theih a ni angem aw tih kha ka ngaihtuahna ah chuan a awm a ni.

Tin, kan Sorkar Flagship NLUP chhunzawm anih tur thu kan hmu a. Hetah hian Election dawn hnaiah NLUP Special Package kan ti a, hmanhmawh takin kan sem chiam a, sorkar hnathawk hlawhin a tuar ang tih ka hlau khawp mai. NLUP hi kum 5 chhung rulling party te induhsak nan kan lo hmang tawh a. Sorkar tharah chuan bo tawh se, party mal induhsakna hi chu tha lo ka ti a. Chuvangin, beneficiaries thlan kawngah te pawh mipui huapzo ngei tura ruahman ni tawh se, a lawmawm hlein ka ring a ni.

Tin, infiamna lamah hma kan sawn zel a, a lawmawm khawp mai a. Sport budget tam zawk ruahman nise, a lawmawm leh zual in ka ring, chutihlai chuan Olympic Vision 2016 neia hma kan lak erawh hi chu dai hnaia Sakhi thangkam te hi kan ang lek lek a, a hnaivai deuh em aw kan thalaite hlawhtlinna hmuhtir kan tum hi ka ti a. Chuvang chuan, thalaite beidawng a kan siam mai te pawh ka hlau deuh hlek bawk a ni. Chuvangchuan, kan vision neih a hi a hnaivai lutuk deuh ni te pawn ka hria a. Chutihlai chuan, Sport kan ngaih pawimawh em

em lai hian Youth activities dang kan hlamchhiah lutuk deuh erawh hi chu kan inenlet te pawh a thain ka hria a ni.

Tin, Mizoram inkalpawhna hrang hrang hi a chhe vek mai a. A tha lai reng a awm lo, neitu awm lo kawng ang mai ni te pawh hian alang a ni. Nikum lamah Annual plan ah khan State Road Project atan Crore 200 kan hmuh ngei tur kan hmu lova, kan efficient tawk loh vang te pawh a ni thei a. Chuvangchuan, sorkar kalta a kan hlawhchhamna kha kawng enkawl chungchangah hian kan inenlet a, ruahmanna fel zawk leh tha zawk kan neih a tul a ni. Working season huna kawng chei hnum hna tan lak a tul khawp mai. A bik takin kan Aizawl khawpui chhung kawng, a penhleh kawng tha lai reng awm lo hi tan la zual turin ka'n in ngenin ka han sawm duh a ni.

Tin, Good Governance a hrilhfhahna ang reengin nimin khan kan Governor zahawmtak khan Clean, Efficient, Responsive administration a awm theih nan chak taka hmalak a nih tur thu te kha a rawn sawi lang a. Chuvang chuan, Election laia kan sawi lar tak mai, party tinin kan pawm Lok Ayukta din kha a hmanhmawh thlak hlein ka hria a ni. Transparent administration mi tiam ang ngei khan kan Local Body te, a bik takin kan AMC (Aizawl Municipal Council) te empower an tul tak meuh meuhin ka hria a. Chuvang chuan power decentralization chungchangah pawh uikawm lova kan phalrai a tul khawp mai a ni. Tin, remna leh muanna vawn him zel hi mitin tena kan mawhphurhna a ni a. Helhovin an mi rukbote rang taka an chhuah a tul khawp mai. India Sorkar leh MNF-ten Inremna Thuthlung Memorandum of Settlement tihlawhtlin loh la awm zawng zawng te pawh theihtawp chhuaha tihlawhtling turin kan Sorkar hi kan ngen duh a ni. Nitin mamawh, ei leh barah te, thil man sang zelte hi Pu Speaker, control a tul khawp

mai. Kum nga chung LPG kan harsa tawh a, kan Sorkar chak tak hianin tihlawhtling ngei turin tanrawn la sela. A tawp bera kan sawi duh chu, sawi tur a tam a Pu Speaker, Sorkar hi beiseina sang tak nen kan lo thlir dawn che u a, a kal sua lna laka venpuitu leh thurawn petu nih kan tum dawn a ni. Dikna te, Rinawmna te, Taihmakna te nen kan ram leh kan hnam tan thawk ho ila, sawisel kan tulnaah pawh huaisen takin ka'n rawn sawisel ngam dawn che u a ni tih kha kan sawi ve duh a ni e. Ka lawm e.

**SPEAKER** : Pu Lalrinawma, Engineer zawk i lo sawm ang.

**Er. LALRINAWMA** : Pu Speaker, ka lawm e. A hmasain helai House zahawm tak mai ram rorel khawl sanga thu theia min siamtu Pathian hnenah lawmthu ka sawi a, kan tlin loh ang anga min pawm a, min ring ngam a, min thlang tlingtu kan bial mipuite hnenah lawmthu ka sawi bawka ni.

Kan sawi ve deuh zawr zawr ang a. Niminah khan kan Governor zahawm tak khan khatiang khan thu a sawi a, a lawmawm hlein ka hria a. Tin, khang a thusawiah te khan NLUP chungchang te a rawn sawi chhuak a, a ropui khawp mai a, kan Sorkar kal lai mek pawhin a flagship programme leh theihpatawpa hma a lakna a ni a. Theihpatawpa pawn hma an la a, a lawmawm khawpin ka hria. Chutih rual erawh chuan thil tam tak ka ngaihtuahnaah a lo lut a, tunah hian beneficiaries nuaikhat leh singhnih tihte leh khatiang te, hetilaia GSDP growth rate 11% during 11<sup>th</sup> Plan tihte a rawn zia ka. Khatiang kan growth rate rawn pung ta te kha a lawmawm em em a ni. Chutih rual rual chuan kan hmalakna zozai leh hetiang karah hian a mipuite hian nitina khawsakna kawngah te zarzo ve te pawh kan lo beisei ve deuh a. Tin, kan thlai thar chhuah chungchangah te pawh hetiang hmalakna zau tak a lo nih takah chuan man man zawk leh man tlawm



zawk a han ei ve te pawh kan lo beisei viau a. Tin, bawngnute te pawh NLUP-ah nasa taka hmalak a nih laiin vawiin ni hian man tlawm zawk a mipuite hnena thleng thei se tih kan beisei lai hian a man te pawh a la to deuh tawlh tawlh zawkin a lang a, heng te pawh hi kan hotuten theihpatawpin hma han la leh ta ula, mipuite hnenah NLUP hlawhtlinna hi kai rual taka a lo thlen theih hi kan beisei a ni tih kha ka'n sawi ve duh a.

Tin, hetilaia kan Governor zahawm takin a sawi, kan tlang ram lo neih hi 50 atanga 60 inkarin a tlahniam tih lai te pawh kha a rawn sawi a, ngaihtuahna a ti thui khawp mai a. A chhan chu tlang ram lo neih hian ram a heh a, chutih rual chuan kan culture, kan hnam ziarang leh kan nunphung, kan pi leh pute atanga bet tlat mai a nih si avangin tawp hlei thei kan ni bik si lo lai te pawh a awm a. Chuvang chuan hetiang a lo tla ta lai hi a lawmawm ka ti a. Chutih rual chuan hemi ti zel tur leh tlangram lo neih te ti tla zel tur chuan eizawna ngialngheta hma kan lak chhonzawm zel kha a ngai niin a lang a, a chhan chu eizawna ngialnghet a awm loh chuan lo vah/lo hal hi chu kan bang tak tak thei dawn lo niin a lang a ni.

Kan bial chhung Chhingchhipah khian MIFCO a awm a, khi thil khi ka ngaihtuahna hian a vei ve em em a, thil tam tak zir chiangin ka va kal tawh thin a, tun inthlan dawn pawh khan ka kal a, a hmain ka kal bawk a. Tahchuan lakhuih herna khawl khi a awm a, hman kum 1998 hmalam vel kha niin ka hria, khalai vel bawra din tawh kha a ni a, a lawmawm kan ti a, khilai bial mipuite pawhin rinna sang tak nghatin khi khawl in nghahchhan khian Lakhuih hmun te pawh kan lo siam tawh a ni. Amaherawh chu chung zawng zawng chu Lakhuih hmun siam a nih tawh hnua Lakhuih chilchhiat tir ngai khawpin kha Lakhuih motor-in a chil chhiat mai khan Lakhuih a chilchhia a ni mai lova mihring tumna leh an phurna zawng zawng a chilchhia a ni. Tahchuan eng hi nge niang aw tiin a chhan ka

zawng a ka vei ve em em a ka han enchiang a. Tahchuan khi khawl atang ringawt khi chuan Mizoram thar zawng zawng a bik takin Chhingchhip khaw thar chhuah ringawt pawh han her chi rual a lo ni lo a ni tih hi ka hmuchhuak a. Chuvang chuan keipawh bial mipuiten rinna min nghah a kan hnena an sawi rik atangin khi khawl khi engtinnge thlak a nih ang tih ka vei ve em em a, Company hrang hrangte tlawh chhuakin vawiin ni ah hian khawl tha tak pawh ka hmu chhuakin ka hria a, chungte pawh chu member zahawm tak te pawh a CD a a thawhlai te pawh in duh a nih chuan ka la sem thei ang che u tih kha ka sawi duh a ni. Khi khi kan tih that theih phawt chuan Lakhuih hi a market a tha em em a MIFCO hote pawh va kawm ta ula a hralhna an hriat tam zia pawh an lo hrih theih che u ka ring a. Chumai piallama Mizorama kan ei ral tam tak pawh hi survey nasa takin ka lo bei ve tawh a chungte pawh chu chhenfakawm tham tak a ni. Chuvang chuan khi khawl khi a thar tha darkar khata quintal 40/50 her thei a min thlak nghal sak thei turin ka ngen nghal che u a. Tuikum bial mai ni lo hetah Tawi bial te, Hrangturzo te leh Zoram mipuiin Lakhuih hi eizawna tlaka an hman theihna tur atan chuan khi khawl khi kan thlak a ngai a ni tih ka sawi duh a ni. Chuti a nih loh chuan tlangram lo neih bansan a hma kan sawn kan intih viau lai hian a than a thu palh ang tih te pawh ka hlau ve bawk a ni.

Tin, a dawt leh atan chuan Market Information System hi ka sawi leh duh a, vawiin ni hian dawrkaite sumdawng leh thildang tam tak hi chuan an thil zawrh an hralhin a man an bithliah thei a ni, amarawhchu kan ramah chuan Agriculture lama kan tharhchhuah ve reng reng hian tumahin a man kan bithliah thei tlat lo hi a hrehawm khawpin ka hria. NLUP ah pawh thil tam tak buatsaih a niin ka hria a a lawmawm. Amaherawhchu NLUP ah hian an hmalakna hlawhtling tur tam tak pawh hi thil tam takah helam atanga a rate kan bithliah thei a nih si loh chuan a buaithlak dawn a. Chuvang chuan Market Information System tha kan

Agriculture Deptt. hotute hian din selangin, tichuan Sawhthing emaw, Chhawhchhi te, La te pawh a ni ang, phai lamin a rate an rawn bithliah zar zar mai hi vawiin atang chuan Mizoram mipui kuthnathawktu tena kan bithliah ve theihna ngei tawh turin vawiin hian kan hotute ka sawm baw a ni. Tin, Pu Speaker hei hun tha tak min pe a, ka lawm e.

**SPEAKER** : Awle midang sawi tur kan awm tawhlo a nih chuan kan Opposition Group Leader sawm ila a tha ang.

**Pu VANLALZAWMA** : Pu Speaker ka lawm e. Kan ngaihthlak tawh ang khan nimin lamah kan Governor zahawm takin helaiah thu a rawn sawi a. Sorkar hmalakna hrang hrang te a rawn sawi a vawiin ah sawiho na hun tha tak mai kan nei a, lawmawm ka ti a. Tin, hei helai hmunah hian ruling lamah kan thu dawn emaw kan ti a opposition lamah kan thu ta daih a, chuvang chuan thu han sawithiam te pawh a har ang reng khawp a. Engpawh nisela ka thiam ang tawh tawkin han sawi ve ila.

Tin, thil pakhat ka sawi ve lawk duh chu Opposition Group kan ti a, sorkar thil tih apiang do mawp tur ang chuan kei ka lo in ngaihtuah vak ngai lova, a then chuan do fe tura min ngaihna lai te pawh a awm a, phone ka dawn te hian in tan a ngai tia min han fuih tute pawh an awm a, a dik tho a, theihtawpa tan kha a dik a. Chutih lai chuan ka mimal anga ka lo ngaihtuah ve danah chuan Ruling Party te finchhuah tur te pawh kan ni zawk em aw a va do ngawr ngawr tur lam ni lovin tih kha ka ngaihtuah dan a awm a.

Tin, ruling lama mawhphurhna neitute pawh ka sawi hmasak duh chu he ram leh hnam tana kan beih hona ah hian in source leh kan source a in ang lo

hlek hi a awm dawn a chungah te chuan a then chu House atanga han aupui chite a awm ang a, a then erawh chu ka lo ngaih ve danah chuan hmaichhana han insawipuia helai hi engtinngge aw tih turah te pawh ka ngai a, tin, a then chu phone hmang te pawn helai hi chu a dik zawk lo maw a remchang zawk lo maw helai kha engnge ni a awmzia aw te pawh kha kan in communicate thin dan turah ka ngai a, chu chu kan hotu lam ten rem in tih chuan chu chu ka ngaihtuahna a awmdan a ni a communicate thin kan sawi hmasa duh a. House Session te chu a awm fo lo va, chumi kar lakah te chuan thil fel tawk lo leh eng emaw a ruling lam atanga in hriatfuh chiah loh te, keini lam atanga lo kal zawk te pawh a awm thei a. Khatiang te kha phone hmangin emaw hmaichhanah emaw in hrih te pawh kha a tul niin ka hria a kan ruling lam ten min hrethiam anih chuan chu chu kei ka tih turah ka ngai a. Tih tur pawimawh deuh he ram leh hnam tana kan tih naah hian a ni te pawh hian ka hria a, chu chu keima mimal ngaihdan a hmasa in kan sawi lang zawk ni se la.

Tichuan, hei a point zawng zawng kha sawivek sen a ni lo ang a. Kan sawilan hmasak ber duh chu NLUP chungchang kha. Campaign laia Joint Platform kan neihah te pawh ka lo sawi ve thin a. Pathian leh mipui zara kan sorkar anih chuan NLUP kal mek hi chu kan chhunzawm ang te ka lo ti ve tawh a. Chuvang chuan helaiah kan ngaihthlak tawh ang khan chak taka chhunzawm chhoh tum a ni te kha tha hle in ka hria a. Chutih laia ka rilru a awm pakhatah chuan a dawngtu thlan te pawh kha fimkhur taka tih ni chuan ka hria a. Amaherawh chu fimkhur sen loh lai te pawh a awm thei a, chuvang chuan fimkhur leh zual a a dawngtu tur thlan te pawh ni chho zel thei se tih kha ka rawtna ni sela. Tin, chutih rual chuan mumal taka tun anga a kal chhoh hi chuan a party ang te pawh in kan party worker te pawh ka lo tih ve thin a chu ti hian a hmasa lamah ruling party ten an han dawng a, tunah hi chuan kan hun hi a thleng chho ve mek zel a nia. Heng hi sorkar

programme a nih ang hian in dawng reng biklo a nge tih ka lo ti ve thin a, kan MNF party worker ho te pawh. Chu chu a kalphung chho zel tur ni pawh hian ka hria a. Hetianga hmalak chhoh zel tura kha tha leh zual a tih anih kha kan beisei a ni tih kha kan sawi duh a.

Tichuan, a point dawt lehah chuan thalai boruak hi a pawimawh khawpin ka hria a. Thalaite hei kan Sport Minister hmalakna atangte khan thil tam tak tih chhoh a ni a, a lawmawm ka ti a. Tin, Olympic Vision 2016 han tih chi te, Catch Them Young han tih te pawh kha a mawiin a tha em em a. Amaherawh chu hmanni deuh lawk a an sawi zawk ka hriat a chu pawisa hi kan nei tam vak chuang lo va helam atan hian tih te hi an sawi a, a deptt. lam a thawk te hian. He vision ropui tak leh Catch Them Young tih hi mumal taka a kal theihna tur chuan pawisa tam zawk pawh kha a tul tih a thawktu ten an sawi zauh hi ka hria a, chungte chu vawiin niah kan tarlang tel duh a. Tin, Self Sufficient in Energy tih chhoh power lama intodelh project, Tuivai Project te pawh kha kan han hmu a. Chuvang chuan a lawmawm hle in ka hria a, chutih lai chuan ka rilrua lo awm ve leh ka lo ngaihtuah mek kan hotute pawhin an sawi zauh zauh, hemi Natural Gas atanga power generate dan, kan thenawm state Tripura ten an tih ang khu tih chhoh ve na tur lam hi ngaihtuahna a awm em aw tih kha ka rilruah chuan a lo awm deuh a, a tha khawp mai a. Khu khuan ram a ti chhe zau ve lo deuh a, tih natural gas te hi kan haichhuak chho mek zel a. Hengte hi a transportation hi a lo buaithlak ang reng a, chuvang chuan khatiang project nen a bun chilh a tih mai kha a tha an ti a. Tripura-ah te pawh khuan kan hriat angin ONGC lam te khan an lo buaipui a hman deuh atang khan. Tikhuan an ti nung tan a power-ah chuan an intodelh chho in hralh chhuah tur te pawh an lo nei chho mek dawn hi a lo ni a.

Tin, hei tuikhuah tur ram nei reng reng lo khung Gulf Countries, Middle East lamah te pawh khuan an power te pawh khutianga an lo generate vek mai hi a lo ni zawk a. Tum khat Speaker ho a kan zin tumin Qatar-ah khuan kan kal a, tahchuan ONGC a thawk thin, khulai Kawnpui, Hortoki vela lo awm ONGC- a thawk thin kha kan zu hmu fuh a, helamah posting-in ka awm a ti a. Chupa min hrilh dan chuan Qatar-ah hi chuan electric power hi a free vek a ni a ti a. Ni eng kan free ang hian kan free vek a ni a ti a. Chu chu Natural Gas atanga an generate kha a lo ni a. Chungte pawh chu kan ramah pawh hian kan hman tangkai theih chuan thil awmve thei tho a niin ka hria a. Helam hmalakna te pawh hi ngaihpawimwh leh zual a va tha em aw tih kha ka ngaihtuahnaah a awm a. Chungte chu kan sawi lang leh duh a.

Tin, a dawt lehah chuan kan ngaithla tawh a, nimin lamah te pawh inkalpawhna lam hei “it will continue to develop all type of road in Mizoram” a ti a kan Governor zahawm tak khan, ‘All type of road in Mizoram’, a ti a, a lawmawm hlein ka hria a, kawngpui lian kan develop ang a, tin a te deuh te pawh develop tur tam tak hi a awm a. Mahni bial chhung han sawi ta ila, Aizawl West-III ah sawn kan han vak a, kawng lian vak lo han develop leh deuh hret a tangkai em em tur ang chi te saw kan lo nei teuh mai a. Sawngte saw helai kan chhiar atang khan a phur awmin ka hria a. Chutih lai chuan a main road pawimawh deuh mai vawiinah hian he House zahawm taka ka sawilan duh chu, Khatla atangin mam nalh em em maiin kawng an siam a, Bungkawnah sawn a tawp hmawk mai a, Maubawk leh Lawipu lam saw chuan kan helh angreng khawp mai a, min hlamchhiah bik hrim hrim a ni an ti a. An rilru put hmang kha kan ngaihtuah pawn ka khawngaih thin angreng khawp mai a. Vawiinah hian kan

hotu lamte pawhin min lo hriat sak a, an inngaihtuah dan kha an khawngaihthlak ka ti a, neglected ni khan an in hre deuh tlat mai a, sawlaia a chhum ta hmawh mai kha. Sawngte pawh saw ka rilruah a awm a, wawiihah kan hotuten min hriat sak sela a lawmawm khawpin ka ring a.

Tin, wawiihah kan Governor-in a sawilan chiah loh ka rilruah lo awm a awm a, chu chu han sawi lan leh lawk ka duh a. Health Care Scheme kan tihchhoh mek pawh hi tha lehzuah tihchho hi a van tha em aw, hei hi a bik takin Sorkar hnathawk ve lem lo, mirethei zawkte leh kuthnathawktute tana an dam mawh hritlana an tangkaipui em em a nihnaah hian ngaihpaawimawh a tulin ka hria a. Kan thian pakhatin a ti a, Sorkar hnathawk kan damlo te hi chu kan hlawh a kiam ve lova, tin, kan senso kha kan bill leh a, a na chiah hi kan tuar a a ti. Mahse kuthnathawktute leh khatiang tiphalo ho damlo hi chu a na an tuar a, an inhlawh thei lova, an sum leh pai dinmunin a tuar a, tin, damdawi man an pe bawh a, a thuah hnih thuah thum bik lutuk tiin a sawi a. Chuvang chuan Health Care Scheme mumal zawka kalpui chhoh zel kha a pawimawh khawpin ka hria a. Chu chu a bik takin Sorkar zem zen pha ve chiah lo kan kuthnathawktute leh loneitu kan tih ang chi ho tan khan a hlu lehzuah dawn a tih kha wawiihah ka'n tarlang leh duh a.

Tin, heta lang chiah lo kan hriat pakhat bawh chu hei essential commodities kan han tih mai eirawngbawl na gas leh buhfai, chini tih ang ho hi ngaihpaawimawh lehzuah a tha mange aw, hei hi kan vaia tan a ni lehzuah lutuk a. Dik tak chuan hei LPG harsa te hi a sum nei deuh tan pawh black-a han lei hi rilruah a na tho mai a, sum tam tak nei tan pawh. Chuvang chuan, chak lehzuah hma lak a, mipui nawlpui tana tih theih a ni em aw tih kha

vawiinah ka rilruah a awm a. Tin, hei thil dang dangte pawh buhfai te pawh a ni zel a. Kha kha sawi tur tam tak a awm a. Engpawhnisela, khang kan sawi atang khan kan sorkar lamte pawn theihtawpa rilru seng lehzuala ngaihtuahna hmang turin ka'n inngen duh a. Tin, sawi tawh ang khan helaiah he House-ah hian kan tiho ang a, tin, House pawn lamah te pawh a tul angin kan infinchhuah zel turah ka ngai a. Tin, keini lam te pawh kan tlin tawk lohna lai a awm thei, kan fel tawk lohnaah te pawh inhrilh hreh lovin he ram tan hian kum nga chung roreltu pawimawh kan nihna tur kiah khan inpawh taka tih ho hi a tha mange aw tih kha ka'n sawi lang tel baw duh a ni. Ka lawm e.

**SPEAKER** : Tunah chuan kan sawihona khaikhawm turin Leader of the House, Pu Lal Thanhawla i lo sawm tawh ang u.

**Pu LAL THANHAWLA, CHIEF MINISTER** : Pu Speaker, a hmasain he House zahawm takah hian member thar engemaw zat kan nei a. Hei hi kan House-ah kan lo lawmin kan lo welcome a ni tih kan sawi a, chumi rual chuan responsible member ni a responsible taka an khawsak ka duh sak baw a ni. Anmahniah beiseina sang tak kan nei a chuingin he House tizahawmtu leh tizahawmtu te zinga mi an nih ngei ka beisei a ni. Kha Pu Speaker, kan Governor zahawm takin a thu sawi kan han sawi hova, kan Governor thusawi kha a tawi tek taw nain a fun kim tha hlein ka hria a, chuingin member-te tan pawh a tlangpuia sawrkar kalphung leh an tih mek tur te a rawn sawi chhuak a, a lawmawm ka ti. Tin, kan member-te han reaction pawh kha a tha thawkhat hle a, a lawmawm ka ti a. Opposition Group Leader hnen atangin kan ngaihthla a, mi experience nei tak hnen atangin kan ngaihthla a. Oppositon nih hi tuna kan Opposition Group leader thutnaah hian vawi thum vawili, vawinga emaw lai ka thu



tawh a, opposition for the sake a opposition nih rik ngawt hi mi responsible lo te tih dan a ni a, opposition kan nih chuan constructive opposition nih kan tum tur a ni. Chung ang zawng zawng a quality a rawn sawi chhuak kha lawmawm ka ti a, kan Group Leader ber ngaihtuahna kha tiang kha a nih chuan a hote sapatal mai mai tur pawh a veng hle ang tih ka ring a ni. Tin, fin chhuah kan ngai a, sawrkar pawh hi a fing ber te awm khawm kan ni bik lova finchhuah kan ngai fo a ni. Chung ang kawngah pawh a thu rawn sawi te kha thil lawmawm tak a ni a, a lawmawm ka ti a, a bik takin a hnenah lawmthu ka sawi a ni. Thawhhona tha tak tun kum nga lo awm turah hian kan neih ka beisei a, kan ram kan hnam tana thlan te theuh kan ni a, bial bik nei mahilangin kan zavai hian zoram pumpui hi kan bial a ni a, chuangin sawrkar hmalaknaah te leh hnam tana thawhhonaah thawhhona tha tak kan neih ka beisei a. Tin, kan Deputy Leader pawh mi experience nei tak a ni a, portfolio harsa tak tak te, department harsa tak tak te lo enkawl tawh thin a ni a, chuangin anni hnen atangin beiseina sang tak kan nei a ni tih he House zahawm takah hian kan sawi hmasa duh a ni.

Nia, NLUP hi min tuipei ta theuha a lawmawm a, campaign lai te khan NLUP sawilo khan an awm thei lo te kha a lawmawm a. Khawbung biala kan kalnaah phei chuan mipuiin min rawn hrilh chu party candidate, an party President ni bawh chuan kan sorkar chuan NLUP hi Congress ai thain kan chhonzawm ang, a ti a, lawmthu ka han sawi nghe nghe a, vantlang inkhawm Farkawn leh Khawbung ah kan neihnaah pawh, a lawmawm takzet a ni. Tunah hian kan hriat angin chhungkaw nuai khat leh sing hnih atan kum nga chung khan kan dil a, an sum leh pai chumi atan chuan cheng vaibelchhe 1500 kan hotuten an dil a, 2830 lai min pe a, kan dil ngam loh tam tak min rawn puhruk a ni. A kalphung hrim hrim hi kan hriat a ngai a, mi tam takin party duhsak nan an hmang an tih te hi thil dik lo a ni a, tin, chutiang chu khawi khua khua emaw a lo awm a nih pawhin

a awm reng a ni, Bible-in a phal tlat hnathawktu thawkrim chuan a rah pawh ei hmasa rawh se, a ti a. Congress thawhrimna vang leh rinawmna leh tawrhchhelna avangin NLUP te hi kan operate theih a ni a, chuvangin hnathawktu thawkrim kha a ei hmasak kha a mawh lo a ni. Mahse chutih rual chuan Congress hi a indaihlo hrim hrim a, chuvangin midang kha kan pe ve zel a, a lo theih lova, an han complaint thin a, mahselangin, kan pek apiangte kha lawmthu sawi nan an rawn lut zel si a, Congress apiang an pe a ni an tih hi a dik thawkhat a ni. Pu Speaker, Congress indaihlo tam tak an pe ve zel a, party dangah pawh mi tha tak tak, mi thawkrim, mahni pawh a thawkrim avanga ei hmu tam tak an awm a, chung ho chu pek loh theih an ni lo, an duhsak hlawm a, mahselangin an lawmthu sawi nan Congress an zawm zel a, chuvangin Congress chauh an pe an tih pawh hi eng emaw kawng zawng tak chuan a dik reng a ni Pu Speaker. Tunah pawh kan han ti leh ang a, an rawn lut zel dawn a, chuvangin Congress chauh an pe min ti lo sela kan han ngen nghal duh bawk a ni.

Tin, hmui dawthei pu mi nih hi Pu Speaker, a tha lo, Bible-in a hua, he NLUP in Central-in Special Package Fund min pek hi thil dangah a pawhpen theih loh sorkar hnathawk hlawh pawisa cheng khat pawh a khawih lo. He thudik hi sawi a tha, pawn lamah an sawi an sawi thin a, tiang sawi ching kha chu inthlanah pawh an tla duh khawp a nia, Pu Speaker. Bible hian hmui dawthei pu mi hi a haw tlat, thudik sawi mai tur a ni.

NLUP hi sorkar hian kan hlawkpui viau a, Department dang atan pawhpen, pawhhek chi a ni lova, NLUP avang hian RKVY ah te pawh cheng vaibelchhia 200 chuang kan dawn pah a ni. Tin, eng emaw chang chuan Department-in harsatna a tawhin kan puk zauh thin bawk. Chutiang chuan kan hmang tangkai zawk a ni. Chuvangin NLUP avanga sorkarin hlawh an la thei lo

chutiang, khatiang tih te hi hmui dawthei pu mite tan lo chuan sawi chi a ni lo. Pu Speaker, sorkar hnathawkte sawi an awm phei chuan action lak nghal zel an ni ang. Sorkar hnathawkin anmahni sorkar an puh tur a ni lo. Chu chu he House zahawm takah hian ka sawi duh a ni.

Tin, inthlahdah avanga crore 200 an dawng lo tih te hi hmui dawthei pu mi te sawi chhuah a ni a, thil pawl tak a ni Special Plan Assistance atan Road Project atan cheng vaibelchhia 200 min earmark sak a, Planning Commission in, min pe leh thei ta lova, Arunachal te phei chuan cheng vaibelchhia 600, Nagaland 300 keini aia an kawng a chhiat avangin keini chu a tha ber pawh kan ni a, tiang chuan tumah an hmuh thei ta lo, India sorkarin economic lamah leh finance lama harsatna an neih tak avangin tuman an hmu lo. He House-ah ngei hian eptu zing atang khan an rawn sawi chhuak thin a, a nih loh zia kan sawi chiang tawh a, mahse min puhmawhna tur an hriat loh avangin kha thudik lo kha kan sawichiang tawh a, mahselangin min puhmawhna tur an hriat loh avangin kha thudiklo a kha an auchhuah an auchhuahpui a, kha thudiklo auchhuahpuitute chu tunah hian he House-ah hian an rawn lang phak tawh lo. Pu Speaker, hmui dawthei put hi a tha lo, ringtu rawngbawltu, kohhran upa nih phei chuan tih miahloh tur a ni. Chuvangin, heng thil hi member zahawm tan chuan sawinawn sawinawn chi a ni tawh miahlo tih hi he House zahawm takah hian ka sawilang hram duh a ni.

Tin, kum sawm chhunga kawngchhia kum nga chhunga siamtha vek thei tura min han beisei hrim hrim hi eptu hotute chungah hian ka lawm hrim hrim, ti em em a kan sorkar chung a rinna an nghat hi a lawmawm ka ti, chuvangin lawmthu ka sawi a. Amaherawhchu, sum ngainatna avangtein BRTF kut atangtein Central Sorkar an lo dil a, khami

transition period avangte khan hun tam tak a liam a. Tin, khatiang avang khan kan thuneihna bakah hnate kha an rawn siam a, kan duhsak em em thin tualchhung contractor-te thawh theih loh a awm ta nawk a, chuvang chuan harsatna nasa tak kan tawk a. Tender han chhuah te pawh a pumpuhlumin kan state sorkarin thu kan nei lova central lampangte rawn inrawlh theihna a ni a. Hetiang khawpa sum ngainat vanga keimahni leh keimahni harsatna insiam tura sorkar hmasa atanga thil lo kal kha a pawh hle a ni. Chuvangin, tunah hian sutkian tumin kan bei chho mek zel a ni tih hi he House-ah hian ka sawi duh a.

Tin, Aizawl West a MZU kawngte khu a chhia tih kan hriat avangin siamtha turin Central atangin fund kan la a, tichuan tunah khuan siamthat mek a ni. Tin, tunah khuan sum awmluh vanga chhonzawm loh a ni lova, bitumen an tlakchham vangin Aizawl khawpui hmun hrang hrangte pawh hi an chhonzawm thei lova, tunah hian an ngaihtuah mek a, harsatna awm kha tunah hian chhonzawm turin hma an la mek a, bitumen khaihlak avang mai chauh a ni tih hi he House zahawm tak hi ka hrilh duh a.

Tin, Delhi lam atanga sum lokal a ni a, tunah hian 2<sup>nd</sup> installment release vat turin kan nawr mek a, a tul ang ang chu central lam atangin buaipui a ni. Inthlan vel lai khan joint platform an tihah hian MLA vawikhat pawh la ni lo, Ruling party-ah pawh la thu ngai reng reng lo te khan an duh duh hi an sawi mai thin a, sum hi zem lianpuiah tam deuh duh tawk tawk lak theih a chumi khami siam nan chuan hman ni rawhse tih theih ang awm khawp te hian an sawi thin a. Chumi ka chhanna chu - ruling party-ah pawh la awm ngailo, MLA pawh vawikhatmah la ni ngailo, budget siamnaah pawh vawikhatmah la tel ve ngailo tan chuan an hawina

lam apiangah an duh duh an sawi hi a thiang mai a. Mahselangin, a tak ram nen chuan a inanglo a ni tih kha ka hrilhfiyah thin dan a ni.

Chutiang chuan vawiinah pawh harsatna tam tak kan tawk a, mahse chuti chungin vawiinah hian kan project te department-in proposal a siam te an rawn sanction mek zel a, tunah hian chhim leh hmar hawi zawng hi chuan kawng kan nei tha viau thawkhat a, a tan zawng hi kawng kan nei tha hlei thei lova ram awmdan leh a tlang awmdan ten a zirloh avangin chung atan te pawh chuan project proposal Ministry-ah kan thehluhte pawh tunah hian an rawn approve chho mek zel a, chutiang chuan zawi zawiin hma kan sawn chho ve mek zel a ni tih he House zahawm takah hian ka sawi leh duh a. Chutiang chuan kawng chungchangah harsatna awm tam tak kan su chho mek zel a. Serchhip atanga Thenzawl-Buarpui kawng te pawh hi sorkar hmasa khan ADB atangin sum an lo dil a, tunah hian a lo kal mekin thawh theih thuai tura buatsaih mek a ni a, chutiang chuan a kal chhung a rei ve hrim hrim a ni tih hi hriat tur a ni, sorkarin duh angin pawisa nei ila chuan a kal zung zung thei mahna.

Tin, tunah hian hmasawna chak zawk avangin leh UPA sorkar hmalakna avangin thingtlang lampang development leh thildang avangin leh ni za inhlawhna an tih te avang hian labour hi an vang em em a ni. Mizoram-ah phei chuan tualchhung mi ngat phei chu labour tur an awm lo. Chuvangin, PWD lampang te pawh an mangang a. Bihar lama an zuk kal pawhin, tunhma in, a za tel tela rawn hawn tur nei thin kha khung laiah pawh ni za inhlawhna te leh rethei chhanchhuahna programme tam tak a awm avangin mi an vang tawh a. Sawmhnih khat lek lek an rawn hawn thei chauh a. Chutiang chuan harsatna kawng hrang

hrangin a awm ve hrim hrim a. Chuvang chuan, labour harsatna avang pawh hian thil tam takah duh angin a kal chak theih loh phah a ni tih te pawh hria ila.

Tin, District Hospital-te hi strengthen leh tihchak an ngai hlawm a. Saiha Civil Hospital hi a tha tawh lo a ni tih kan hria a. Chutih laiin bialtu MLA, Minister ni bawk Pu Hiato pawhin vawi engemawzat a sawi a. Central lamah kan thlen a. Tunah hian a chei thatna tura sum vaibelchhe 19 zet kan dilah vaibelchhe 16 an rawn sanction tawh a. A sak that hna thawk turin amah DoNER Minister ngei pawhin kha lam pang avang khan Saiha pawh a va tlawh a ni tih kha kan hriain ka hria. Chutiang chuan District hrang hrangah District Hospital te hi tihthat mek an ni.

Tin, Disaster Management lamah hian kan hotuten nasa takin hma an la a. Central-ah pawh Central Disaster Management Authority te nen pawh Meeting neiin, full sitting neiin tum hnih, tum thum kan thu a, kei pawh ka tel ve a. Chungah chuan kan rama chhiat rupna thleng thei ang chi te pawh hi kan thlen nasa a. Ramhlun Venglai lei tlahniam chhan nan pawh Rs. 21 crore lai kan dilah, first installment Rs. 5 crore leh 55 lakh zet min rawn pe a. Hemi hmang hian heti lai bialtu MLA zahawm tak Pu Liansailova hovin ruahmanna tam tak siam a ni a. An zavai hian hmun tharah kan dah khawm dawn a. Kan dah khawmna tur hmun pawh tha tak kan lei tawh a. Chumiah chuan School tur te, Market tur te, thil engkim kan mamawh chi kha ruahman a ni a. Chutiang chuan fel fai takin tih a ni. Tin, Laipuitlang leimin tuarte pawh helaiah hian telh ve dan ngaihtuah a ni.

Tin, kan ram hi a leilung a nghet lova. Tin, khawvela lirnghing nat theihna ber red seismic zone a puan a ni a. Kan hun hmasa lam atang pawh khan kan hriat avangin, kan Geologist-te kan mithiamte hnenah a hlauhawm zual laite, a

hlahawm nep deuhthe, a hlahawm lo laite earmark vek turin kan ti a. Chutiang chuan an thawk a, mahse, Mizo te hi kan luhlul ve hrim hrim a, phal lohna rama awm lui ngat ngam te kan awm a, chuvang chuan, harsatna kan tawk thin a. Lei tlahniam amite chhanchhuahnan inhmunte kan han pe a, hmun dang dangah, mahse, khua a han tha a, hlahawm nep deuha a lanah an kir leh a. Khatiang khan harsatna Sorkar ang pawhin kan lo tawk tawh thin a, chutiang chuan tunah hian a la kal chho mek zel rih a ni. Mahse, chuti chungin Disaster Management Department hian kawng hrang hrangin hmalakna a nei chho mek zel a. Mamitah te, Ngopaah te pawh lei tlahniam a awm tih kan hria a. Chungte pawh chu a chhan dan min ngaihtuahpui turin Central lama mithiamte kan biain, kan rawn mek zel a. Anmahnite pawh lo kalin, vawi engemawzat an rawn en tawh a ni, Pu Speaker, chutiang chu a ni. Chuvangin, heng harsatna leh chhiatrupna lo thleng thei laka inven dan te leh a lo thlen pawha awlai taka inchhanchhuah dan zir tur pawhin mi tam tak mi thiamten min train sak tawh a. Laipuitlang a min kan tawrh tum pawh khan chung mite avang chuan harsa em em lovin chhanchhuah hna te pawh kha a thawh theih a ni tih he House-ah hian ka'n sawi duh a.

Tin, LPG tih te leh thil dang dang hi harsat lai a awm a. Tuna kan harsat tawh loh hnu pawh hian eptu lam atangin sawi tur an neih loh avangin an sawi harsa lui talh zel a. Heng ang te pawh hi eptu nih vanga a ni lo zawng a sawi ringawt hi thil tha a nilo tih kan hriat a pawimawh a. Hei kan zavai hian ringtute kan ni a. Ringtu kan nihna hi chawlhnia nalh taka inchei a inkhawm nan nilo, kan nitin hnaah te hian ringtu kan nihna te hi hmangrim hle ila chuan Mizote hi tun ang mai mai hi kan nilovang tih kei ka ring a. Chuvangin, ringtu kan nihna hi hmanrim tur a ni kan nitin nun thlengin. Chutianga kan kal chu a pawimawh hle a ni.

Hei, Games and Sports lamah te kan hotute hmalakna a tha hle a. Olympic Vision 2016 hi vision a tawi an tih hi 2100 thleng pawhin vision te chu kan hotuten an nei ve. Mahse, Olympic Vision 2016 kan tih hi chu, tun London Olympic-ah khan Mizo thalaite telve pakhatmah kan awmlo a ni. Chuvangin, Rio-ah 2016 ah Olympic a awm dawn a, chumi atan chuan kan thalaite buatsaih ve kan duh a, a tam thei ang ber thawn kan duh a ni. Chuvangin, discipline thlan deuh bikah kan chem kalna, kan til thenna lampang deuh kan hotuten an thlang chhuak a. Chung ang atan chuan kan hotuten a prospective deuh leh khatiang ho kha an train a. Chumi vision atan hei chu kan tih a ni. Hemi piahlamah pawh hian vision kan nei ve tho. Mahse, tuna kan in concentrate-na chu Olympic Vision 2016 a ni kan tihna mai a ni. Chutiang chu a ni tih hi hria ila. Tin, Catch Them Young kan tihte hi India ram pumpui ah tha an ti. An appreciate em em a ni, tin, nu leh pa tam tak hi an lawm a ni. Tunah hian sum duh ang tawh kan neihloh avangin nu leh pa ten an rawn hruai Catch Them Young a tel tur hi kan accommodate theilo mai chauh zawk a ni. Chutiang khawp chuan tunah hian heng catch them young policy te hi an lawm a, nu leh pa hlei hlei hi an lawm a ni. Naupang kum14 hnuai lampang kan mithiamten thahnemngai taka khawi khawiah emaw an han camp pui a, an han riah pui a, tiang khan nun dan tha, thlarau nun thleng kaihruai thei an han zirtir te hi lawmlo nu leh pa an awm lo. Mahselangin, kan harsatna zawk chu an duh zat zat an rawn hruai zat kan accommodate theilo hi kan harsatna ani chauh zawk a ni tihte he House hi ka hrilh duh a.

Chuvangin, Olympic Vision 2016 kan tih hian thildang kan thlauhthla tihna ni lovin hemi atan bik hian mi a prospective deuhthe kha mithiamten an train a, chutiang chuan Brazil a Olympic lo awm turah hi chuan Mizo thalai tam thei ang ber i thawn teh ang, i tir teh ang tiha thahnemngaihna a ni tih hi hria sela, hemi



piahlahmah hian vision kan thiam ang phak tawk leh kan phak ang tawk tawk chu kan nei ve e tih hi he House hi ka hriattir duh bawk a ni.

Tin, Games & Sports chauhah a ni lova, kan thalaite hi ram future tur an ni a, chuvangchuan, train that an ngai. Skill development lampang te pawh hi kan theihpatawpin kan uar a, Pu Speaker, Central a Skill development council te nen pawh kan indawr reng a. Chutiang chuan, a lekhathiam lo awmlo pawh hetah a hnuaihning zawk deuhah pawh kan tawng an huatthu suhah...engeni....thing mistiri, cement mistiri thlengin YMA te nen tanghoin kan polytechnic neih ang angah te hian a theih zat zat kan train a. Lumeh te, khatiang thleng khan a lekhathiam chauh ti lovin a lekhathiam lemlo pawh thalai tam tak kan nei a. Chunggho skill te pawh chu develop sak kan duh a. Hmanni lawkah pawh Delhi bulah Noida-ah Maruti company hnuaiia train turin mi sawm tam kan tir a ni. Chutiang chuan, kawng hrang hrangin kan dap ve reng a.

Tin, chumai nilovin khua leh tui tha chher nan sipaia tan a tha tih kan hotuten an hria a. Rambuai hmain India ram sipai hrang hrangah Armed forces-ah leh Paramilitary forces-ah a thawh tha ber pawl kan ni. Ex-servicemen pawh kan population ang hu chuan a ngah ber kan ni thin a. Rambuai hnuah khan India Armed Forces-ah kan tlem ta tial tial a. Kan hun hmasa lam atang tawh khan a tam thei ang ber thawnluh kan duh a. Tun kan term kalta kum nga chhung khan mi thalai sangthum vel lai kan hnawhlut hman a ni. Tin, India ram sipai hote pawh kan ngen angin, Aizawl khawpuiah leh District-ah chauh nilo hmun hrang hrangah te pawh kalin tiang khan kan thalaite a tam thei ang ber sipaia min laksak turin kan ti a, Aizawl khawpuiah District chauh nilo hmun hrang hrangah te kalin sipaiah min lak sak turin kan ti a. Tin, chu mai chu a ni lo, tunlai khawvelah chuan French, Asia-ah te British Army te hi sipai tha pawl hmingthang pawl an ni. British

Army ah te, French, Asia-ah te an luh theihna turin kan thalaite kawng hrang hrangin hma te kan la a, India rama kan thalaite chutiang ang chuan kan ti a, British Army phei chuan tunah hian kan thawn lut zeuh zeuh a ni. Chutiang chuan kawng hrang hrangin self employment a nihna tur te pawhin hma lak a ni a, North Eastern Council-ah pawh hian Scheme Development Centre Mizoram min dah sak turin kan ti a, chutiang chuan kawng hrang hrangin kan hotuten kan thalaite tan hma an la a ni.

Standard Education, Quantity Education neih tur te pawh kan hotuten hma nasa takin an la a, chung atan chuan Education reforms te pawh kan nei tawh tih kan hotute atangin hriat a ni a, chutiang te pawh chu a hlawhtlin theihna turin mi chi hrang hrangah sum mamawh cheng vaibelchhia 700 kan neih theihna turin hma kan hotuten an la chho zel a ni.

Tin, ram buai hma khan keini hian kan kutzungchal chhiarsen loh Army Commission Officer kan nei a, Meitei ho sawn pathum chiah an nei a, an zinga pakhat phei chuan Assam Rifle-ah a rawn thawk nghe nghe a ni. Mahse, ram buai chhung khan anni chuan Sainik School te an lo nei a, tunah chuan an sawi hmangin Meitei ho sawn India Arm Forces-ah hian Commission Officer 1000 vel lai neiin Major General te pawh an nei tawh a ni. Keini chuan tunah hian kutzungchal pawh chhiar tham kan nei lo a ni. Chutiang avang chuan sipai lamah leh khua leh tui tha chherchhuahna turin Sainik School kan hun hmasa a kan lo ruahman tawh mahselangin kum 10 chhung awm kha tunah hian kan hotute an thar thawh leh a, tichuan, Chhingchhipah, Chhingchhip mipuiin hmun tha tak min pe a, tunah hian hma chak takin lak chhoh a ni. Sipai lama an luh nan chauh pawh nilovin khua leh tui tha chherchhuah nan a ni a, India ramah politician tha tam tak te, Chief Minister te pawh hi Sainik School Product tam tak an awm a,

chungte avang chuan Sainik School hi a pawimawh zia kan hotuten an hriat avangin chutiang chuan hma an la a ni tih hi kan hriat atan House ka han hrih a ni.

Tin, Health Care Scheme kha chak takin kan hotuten hma an la reng a, sum harsatna avangin duhthu a sam lo a nih pawhin kha scheme kha a kal reng a ni. Tin, chumai ni lovin tunah hi chuan Labour and Employment Ministry atangte pawhin BPL-te tan tanpuina kan Minister-ten an hai chhuah sak a. Tunah hian sorkar hnathawk lo, Medical Refer la ve thei lo tam tak an awm a, chungte tan pawh chuan tunah hian hma chak takin lak niin tam takin a benefit hi a zar an zo tawh tih te he House hian lo hria ila.

Tin, Mizo hi engemaw takin inthlah dahna kan nei a, in register hun khaw hrang hrang a an tlangau te hi lo ngaihven tha duh lo, mahse langin mamawh leh si tam tak an awm a, chung angte pawh chu tanpui theih dan leh ziahluh dan sorkarin a ngaihtuah a, chutiang khawp chuan sorkarin hma a la a ni.

Tin, inthlanna felfai leh thianghlim tak kan nei a, a lawmawm takzet a. Law and Order-ah hian problem kan nei vak lo. Amaherawhchu, inthlan dawn hian hel kan ramah awm ngam lem lo ten min tibuai thin a, Mizo hnathlak ni ve si, HPC(D) tih te, heng ang hi hetiang inthlan apianga rawn tibuai an nih chuan he sorkar thar hian ngaihtuahna tharin a ngaihtuah a tul a, tin, Mizo leh Vai an rubo a, hemi an rukbo hi Law and Order problem a ni a, inthlanna felfai tak kan nei thei kan ti ngam dawn em ni ? tihte a awm a. Mahse langin, rukbo turte khan, khang helho khan kan ramri hrulah an rubo dawn a ni tih hria se an kal miah ka ringlo. Tin, khangho khan an rubo dawn tih hria ila kan Police-te hian lo hre lawk se chu khulai khu an lo zu veng anga, an lo talh awk awk mai ang. Chuvangin,

heng ang hi inpuhchhiat nana hman chi niin a lang lova, Police-te hian lo hre lawk se chu khulaiah an lo veng anga an lo talh awk awk mai ang, chuvangin heng angte hi inhmuh chhiat nana hman talh chi niin a lang lova. Helaiiah hian demand an nei a, kan Sorkar, kan Police huaisenten kan Home Minister kaihhrainain leh kan Chief Secretary te nen ngun taka an ngaihtuahin tih dan an ngaihtuah reng a ni, chutiang chu a ni.

Term hmasaah kha chuan sum an demand a, sum kha pe duhlo niawm takin Kohhran hruaitute an ruai a, negotiate tir niawm takin an kal tir a, hetah an hriat loh lamah sum kha an lo pe a, sum ten an tlanhhuak thin a. Khatiang khan kan Home Minister hian a ti ve ngai lo. A chhan chhuak mai a ni, inkahchilh a ngaih chuan a kahchilh mai a. Tun tumah pawh hian inkahchilh pawh pawh kan ti lo. Amaherawhchu, kan mizo thalaite nun kha a risky dawn avangin inkah ngai kher lova chhanchhuah dan, uluk takin, ngawrh takin an la ngaihtuah zawk a ni, chutiang chu a ni a. Tunah hian an demand ang hi Sorkar-in neiin pe pawh niselangin naktukah a dang pawhrawn ti leh rawh u aw, kan hriat loh hlanin tihna ang tluk a ni dawn. Khatiang kha kan tum dan a ni lo, an sim tawh nan tih kan tum a ni. Tin, tunah hian anrawn tih fo tawh lohna turin khunglaiah khuan engtingge kan Police huaisente kan dah anga kan duty tir ve ang tih kan ngaihtuah a. BSF an awm a, mahsela, annin Tuikuk leh Mizo leh chi hrang hrang kan awm a, annin min hre hrang lova, an tangkai tur angin an tangkai thei lo.

Hmanniah an hotupa ber ka ko va, ka sawi pui a, tangkai deuh an nih theihna turin, tin an zingah Muster Roll te leh pointer te pawh an nei thei lawm ni tih thleng te pawhin ka hrilh tawh a. Tunah hian theihpatawp kan Sorkarin a chhuah a, kan la chhanchhuak thei lo hi a pawh hle a.

Ralthuam hmanglo va chhanchhuah dan kan ngaihtuah mek a ni. Vawiinah hian hun hmasa kum 10 chhung kan ram hi hel ho zalenna ram ni thin kha a ni ta lo hi vawiinah chuan a lawmawm hle a, kan Home Minister leh police ho hmalakna a ni tih hi kan hria a, an hnenah pawh lawmthu ka sawi a. Tin hel tenau tih te khan min tibuai fo tawh lo turin kan hrilh a, min rawn tihbuai fo chuan ngaihtuahna tharin an chungchang hi kan ngaituah dawn. Chutiang chuan kan ram mipuite hi a tul ang angin chhan kan tum a, he ram hi hel awmlohna ramah siamin chutiang chuan theihpatawpin hma kan la a ni. Rawn tibuai fo tute, inthlan dawn apianga rawn inrawlh ve ziah tute hi engtin nge kan enkawl dawn tih hi kan la ngaihtuah tur te zinga mi a ni a, a tharin kan ngaihtuah a ngai a ni. A tul chuan kan police ten HPC duty hotute pawh a hotu lu ber berte an thlung fel vek thei, a tul kan tih hunah chuan. Mahse inbe zawk ang u an tih avangin, inbiak chu a tha lawm kan ti a, kan chhuah leh a kan inbia a. Mahselangin SPC din ngai reng reng lo te khan palai a te khan an lo tel ve a, tunah hian indo lo tul leh ta se kha kan palai te ho kha man hmasak ber tur a ni maithei a ni. Chuvangin chi leh chi ti zawnga he ram tihbuai tumtute hi kan en mai mai dawn lo, a tul angin he ram hi kan humhalh anga, a mipui chengte pawhin chhungkhat laina leh inunauna kan vawn him theihna turin hma kan la zel dawn a ni tih Zoram mipuite pawh kan hriattir duh a ni.

Tin, PC an tih te hian Hydel project te an ta bik ang hrimin an sawi thin a, an hnu hma chu kan hmu lem hlei lova, mahse kan hotute pawn an sawi nasat em avangin leh kan politician duh takte fiamthu ti tak deuhin PC ho chu an thih pawihin Bairabi hi an tlawh hmasa zel a ni an lo tih tawh te kha a pawimawh tih kan hria a. Kan hotuten tunah hian thawh mai theih turin megawatt 75 in an buatsaih tawh a ni. Hei Tuirial Hydel Project megawatt 70 pechhuak thei tur hi kan hun hmasa 1978 August thla khan a lung an phum, Japan sorkar sum a siam tur kan ni a, an phur hle a, a hmunah kan hruai a, kan hotuten chutih rual chuan tui

megawatt 280 pechhuak thei tur hi Japan ho bawk chu kan dil a, Economic Development Fund atangin, min pek tumin an phur hle a, mahsela kan awmlah chhung khan Tuirial Hydel Project a tirah kumpinu hun lai atanga lal hun thlengin chhungkua ram ro nei, compensation pek ngai engzat nge awm tih uluk takin kan chhui a. Chhungkaw sawmli pariat chiah, chungte chu compensation pek tur an ni a. Tin, notification kan chhuah nghal a, helai attachment area-ah hian tu te mah VC pass emaw, LSC emaw pek tawh loh tur an ni tih kan chhuah a. Chumi pawisa lo chuan Revenue Department-a an Director te leh Assistant Settlement Officer ten Surveyor paruk vel lai hruaiin mi sawm pahnih emaw zet hnenah an lo pe lui a, kan suspend vek a chungho chu, na takin an chungchang ngaihtuah turin prosecution kan siam laiin kan tla ta a. Tichuan, kum khat vel an ngawi vang vang a, a kum khat ral hnuah chuan khulai vengah khuan hetilai Chief Minister leh a chhungte leh khilamah Champhai lampang mi sangkhat chuang khan huan/lo an lo nei der mai a lo ni a, khami compensation pek kha a tul a. Chief Minister nau huaihawtin hmar tlangvalte nikhatah ` 100 in an ruai a, bandh an siam a, khawvela bandh rei ber, thla hnih zet bandh an siam hnuah Sorkarin a ngaihsak miah lova, NEEPCO a buatsaihtute, khami Hydel Project satute khan tihngaihna an hre lova, a thawhna tur sum zawng zawng an pe zova, tichuan an tin san ta a ni. Kan lo kir leh hnu hian kan hotute hmalaknain chhunzawm leh a ni a, tunah hian 2014 kum tawp emaw 2015 kum tirah emaw khumi mega watt 60 pechhuak thei tur khu kan commission thei dawn a ni.

Tin, Tuirial Hydel Project lung ka phum lai khan Japan hotute chuan, “Ka Pu, tun ang nakum hunah hian Tuivai mega watt 210 pechhuak tur pawh hi a lung i phum leh thei ang”, min ti a, kan lawm hle a, kan phur hle a. Mahse kum sawm chhung khan ngaihsak a ni ta miah lova, chuan kan lo kir leh veleh kan hotuten theihpatawpin Central lam an han nawr a, tuna India Sorkarin a tih ngai

miah loh viability gap funding hnuai min buatsaih sak dawn a. Tin, India hmarchhakah chuan project kalpui hmasak ber a ni dawn a, kum nga zawh tur a ni a, cheng vaibelchhe 1750 India Sorkarin min ruahman sak a, first installment pawh an rawn release tawh a. Tender company lian pui pui pasarihin an rawn chhang a, chu chu tunah hian kan mithiamten thlang turin an inpuahchah mek a, tichuan thawh nghal theih a ni dawn a ni. Tin, tunah hian hmachhawp tam tak a awm a, mega watt 42 pechhuak thei tur Tuivawl te, mega watt 37 pechhuak thei tur Tuirini te, tin, mega watt 50 pe chhuak thei tur Tlawng hnar lamah, tin, Lungreng mega watt 815 pechhuak thei tur Burma ram chim thei tur, tin, Mat mega watt 70 pechhuak thei tur, chung zawng zawng chu tunah hian pipeline a awm vek a, a buaipuitu tur Company te pawh ruahman an ni. Amaherawhchu, lei hnuai hausakna natural gas leh petroleum te hi tunah hian ngawrh takin umzui an ni a.

Kan sawi tawh angin Bairabi lamah tam tawh tak kan hmu e an ti a, Saitual bulah, Keifang bulah tam tawh kan hmu tawh e an ti bawh a. Chung ang zawng zawng chu chak zawka hman theih tura laih chhuah tir kan tum a ni. Central Minister pawh vawi duai lo ka hmu tawh a, tin, he thil hi tunlaia kan Opposition Group Leader Pu Zawma hi MP a nih lai atang tawhin tui tak a ni a, vawi hnih/vawi thum kan lo sawi dun thin tawh nghe nghe a. Tichuan tunah a taka hman theih tura a lo rem chho teah pawh hian engemaw chen chu a hmalakna a tel a ni tihte he House zahawm tak hi kan hrilh duh a ni. Chutiang chuan vawiinah hian hai chhuah turin chak takin hmalak a ni a. Vawiin tlai dar 4 leh a chanve velah hian ONGC hotute leh Oil India Limited hotute pawh ka ko nghe nghe a, an pu ve ve te an lo kal a ni.

Chak zawka hman theih tura hmalak kan duh a, Gas cylinder te hi inpuhmawh nana hmang a, a cylinder te pet lang pet lang lo hian in ah tui kan herh

haw ang mai hian kan tap chhak zawlah herh haw theiha siam hlan te hi kan nghakhlel a. Chung chu hmasaah kan dah a ni. Chhim lampang saw Reliance Company te chan a ni a, tun thlengin kut an la thlak lova. Nirupam Willy hnenah vawi hnih/vawi thum ka sawi tawh a, hmanni khan reminder ka pe a. MP zahawm tak Pu CL Ruala'n a copy keng thlain a va hmu tawh nghe nghe a, chak taka hmalak a tul dan te leh Reliance Company te hian an ti thei dawn lo a nih chuan midang ngaihtuah dan tur te a lo sawipui nghe nghe a ni. Chhim lampang Lunglei District leh a piah lampang saw mithiamte chuan natural gas leh petroleum hi a tam zawk an rin avangin ngawrh zawka tih kan duh, mahse Reliance-in hma an la thei lo a ni hi pawl kan ti takzet a ni. Tichuan, natural gas hi hman theih tura tun atanga kum hnih/khat lekah kan siam anih chuan CNG motor petrol ang atana hman te hi boruak a thianghlim zawk a, kan nghakhlel a, tin, power siamchhuah nan pawh a tlawm zawk a, a awlai zawk a, boruak a thianghlim zawk a.

Kum 10 kan awm loh chhungin Tripura ho khan min lo tlanpel a, tunah khuan Palatana-ah Megawatt 750 emaw lai pechhuak thei tur India President-in a hawn tawh a awm a. Chuta tang chuan Megawatt 22 kan chan tur a ni a, a man pawh kan pe fai vek tawh a. Mahselangin, engemaw diklohna technical snag avangin an operate hlei thei lova chutiang chuan a awm a ni. Chu chu kan neih theih thuai kan beisei a, chutiang a nih pheih chuan Tuirial nakum emaw vela kan zawh bawh chuan engah na na na hi chuan kan intodelh ang a. Tuivai a pumpuia kan chan tur hi revenue lak nan kan beisei a ni.

Tin, Natural Gas hi chutianga hman theiha kan nei thei dawn a nih chuan kan lui zawnz zawnz zawnz hi khuah a ngai dawn lova, Tourism atana tangkai awm deuh te chauh kan khuap anga a bak hi chu environment a tichhe thei



a biodiversity pawh a tichhe thei an ti a mithiamten chutiang zawnga kalpui lova natural gas zawk hi hman tangkai dan kan hotuten an ngaihtuah a ni.

Tin, kan hriat angin Burma nen border trade kan nei a tihchak zawk kan duh a, tichuan tunah hian kan tichak mek a, non-custom station te pawh zawh tawh a ni a, Central Minister-te pawh hawng turin kan hun hmasa khan tun term kaltaah pawh kan sawm thin a, an lo kal hlei thei lova, chutiang chuan chak takin hma kan la.

Tin, Central sorkarin Zokhawthar atangin Tidim leh Falam zo hnahtlak te chenna chin khi zohnahtlak te insuihkhawm a rorelna pakhat hnuai awm te hi kan zavai hian kan dream a ni a. Mahse thisen chhuah a tharum thawha ralthuam cheleka thisen chhuah ngai lovin Pathianin min hman tangkai hun tur zawk a tihah chuan min la dahkhawmin independent te pawh min la pe ang tih kei ka beisei a. Khinglai ram zawng zawng khi Mizoram vek a ni, chuvangin kan theihtawpin kan ngaihtuah ve a, khing thenawmah te khian a theih chinah power te pawh kan pe a, tin, Lungreng kan khuah turah te pawh Burma ram a chim dawn a, tin, sawtah Bay of Bengal-ah chhuahka kan neihna tur hmunah te pawh Burma ram kaltlang tur a nih avangin Burmese Ambassador chu India-ah pawh kan sawm chho a. Helicopter-in an va entir a, Zo inpuite an hlimin an phur em em a Lungreng kan khuah tur te pawh chu an hlim em em a ni. Chutiang chuan a ram leh a felna kan hotuten an zawng vek tawh a.

Tin, heng hi kan hotute an phurna em em chu khawvel zawng zawnga kala chanchintha thilsiam zawng zawng hnena hril tura kohte kan nih angin khawvela ringlo mi tamna ber pahnih China leh India ramah remchang takin sakhaw lian ber ber pathum hual behin min dah chungin chutiang chuan min rawn

zawng chhuak a. Chuvangin Burma ram te nen border trade tha tak kan neih rual hian zohnahthlakte luah chin piah lamah chanchintha hrilhna hun remchang tak kan nei dawn a kan hotute an phur a. Tin, Bangladesh nen border trade hun hmasa khan kan ruahman vek tawh a Pu Speaker, amaherawhchu kum sawm chhung khan hmalakna tehchiam a awm lova tuna kan lo kir leh khan India rama lo zinin Bangladesh P.M. Sheik Hassana P.M. ruaithehna Bangquet-ah kan inkawm a, ka hrilh a, a phur hle a. Chik takin keini ai chuan anni tan a tangkai zawk dawn a ni tih ka hrilh a, a phur hle a, a pawm hle ni tur a ni. A tuka Press Conference-ah khan India nen border trade kan neih hi kan belh dawn a, Mizoram zone-ah a niang tih kha a puang thei a. Tin, P.M in Bangladesh a zin khan min hruai ve a, chutah chuan kan sawichhuak leh a a phur hle ni tur a ni India rama an palai High Commissioner a rawn tir leh a sawtah Kawrpuichhuah thlengin an va kal tawh a. Tin, a hnuah Chittagong Hill Track Development Minister a rawn tir leh a kan Minister Pu Rina Sailo te nen inhmuin thil tam tak a kalphung turte an sawiho a. Tin, thlathum thlali vel kal taah khan an senior Minister a rawn tir leh a chu chuan an va en tawh a ni. Chutiang chuan border trade tha tak kan neih theihna turin hmalak a ni a, kan hotute phur lehzualna chu Pathianin hna min pek Mosoloman ho hnena chanchintha hrilhna remchang a ni dawn a ni.

Tin, sawtah Bay of Bengal-ah chhuahka nei turin hma kan la mek a, Lawngtlai atangin Burma border thlengin 100 km a ni a. Tunah hian 75 km vel formation cutting an zo tawh a, tichuan Burma ram chhungah lutin an lawng chawlhna lian kha kan va hman tawm dawn a ni. Tichuan, Asia chhimchhak ram ho zawng zawng, kan ruangam ang pu, kan hmel ang pu mi ringlo mite, khing ho khi tunah hian kan kohhrante leh mi thahnemngaiten Missionary tirin Cambodia, Laos khitah Taiwan thlengin an han chho tawh a ni a. Chungte nena insumdawntawanna tha tak siam kan tum a, chutih hunah chuan India hmarchhak

state te pawh hian sumdawnna chhuahkaah an rawn hman kan beisei a, Mizoram hi a pui tham ve dawn a ni. Chuvangin, tuna Bairabi atanga Sairang thlenga rel kawng kan lak mek kan thawh mek hi 2015-ah puitlin an in beisei a, tichuan Lawngtlai thlengin kan la pheih leh dawn a ni. Chu chu India sorkarte nen pawh kan sawifel tawh a, a chhan chu sawlaia sumdawnna hmunpui kha land transport-ah chuan rel hi a tlawm ber avangin Lawngtlai thleng lachhuak turin tunah hian ruahmanna kan siam a ni.

Sawlaia sumdawnna chhuahka neih kan hotute phurna em em pawh, chung kan hmel ang ruangam pu ve ringlo ho hnenah chuan sumdawn rual khan Chanchintha hrilhna remchang zawk a inhawng dawn a ni. Chuvang chuan chutianga Chanchintha kan hrilh chhung chuan he hnam hi politician thenkhat inti Mizo, Nationalism hmui ten hlau thin mahselangin tute mah Lalpan min chimral tir dawn lo tih hi ka chiang a. Chuvangin heng hi hmanhmawh takin kan hotuten an bawhzui a ni. Tichuan Pathian lamtang programme nei zelin he sorkar hi kal kan tum a, malsawm tlakin. Tihnuam tak leh thuawih taka in awm chuan in rama thil thate in ei ang min ti a, chumi a thutiam chu tawng buak kan tum a ni. Chuvangin tunah hian malsawmna tam tak anchhia ni lo, a thinurna ni lo tawng baw turin kan sorkar hian he ram leh mipuite hi a duang a.

Pathian hnam thlan kan inti a, ringtu zaa za kan inti a, mahse chutiang hmuh chuan mi hian min hmu si lo. Chuvangin vawiinah hian ei leh barah, sum leh paiah intodelh hnam nih kan duh a, vai kan tih, hmusit taka kan tih, milem be ho buh leh bal, sum leh pai rinchhan lo a khawsa thei lo ringtu zaa za Pathian hnam thlan hi a ropui lo va. Chuvang chuan hnam ropuiah, hnam zahawmah siam kan duh a. Sum leh paiah, ei leh barah intodelh turin he ram leh hnam hi kan hotuten an buatsaih a, kan sorkarin a buatsaih a. Malsawmna tam tak tawng buain, chu

malsawmna kan tawng buak chu chhungkaw tin hnenah lutin, luang lutin chhungkaw tinin an lawmthu sawina atangin an Kohhran theuh thawhlawm lo pung sela, tunah pawh NLUP avanga a lo pung tawh der ang hian. Tichuan Kohhran hrang hrangte thlarau bo zawngin luangchhuak sela, an luanchhuah tam poh leh chung lam pang malsawmna kan tawngbaw dawn tih hi kan hria a, chumi ram chu kan thlir a, chumi ram pan chuan Vawiinah hian kan kal a ni. Kan hotute hian an ar khawthim dai ve lo, kan kalna tur leh he hnam kan hlankaina tur ram leh hmun hi an hria a. Tichuan hnam zahawm kan lo ni ang a, kan zinga ringlo mite leh pawnlam atanga minrawn thlirtu ringlo mite pawh hian, ‘e, anni zawng Pathian nung chenchilh hnam an lo nih ngei hi,’ ti a kan Pathian hi anrawn awh ve theihna turin he ram leh a mipuite kan buatsaih mek a ni. Chutiangah chuan Vawiinah hian Kohhran te, tlawmngai pawl te leh party dang te min tawmawmna min tanpuina kan dil a. Tin, tawngtai mite pawhin bang lo va min tawngtai sak turin kan sawm bawk a ni. Chutiang chuan he ram hi kan hotuten an kaihruai a, min arkhawthim daipui lo tih he ram mipuite kan hriattir duh a ni.

Vawiinah Pu Speaker, kan Governor zahawm tak Address sawihonaah tute pawh a participate apiangin zahawm taka thu an sawi avang te leh thusawi tluang tlam tak te kan ngaihthlak avangin a lawmawm ka ti takzet a. Tichuan, Vawiinah hian Krismas leh Kum Thar kan hmachhawn mek a ni, kan Home Minister hmalaknain Krismas vai puja ang maia kan halpuah leh thil dang mihring tana hrisello kan lo chin thin te tunah hian kan Home Minister tan laknain leh kan tlawmngai pawl te tanrualnain a awmlo ta hi thil lawmawm tak a ni a. Tun tumah erawh hi chuan Kumthar Ni-in Sorkar-in hmun remchang deuh atangin mipui vantlang zawng zawngin an hmuh theih tur Kumthar welcome-na, view point deuh atangin reilote minute 5/10 vel lek ti sela a tha awm mange aw tih ngaihtuahna te kan nei a. Mi nazawngin a kan duh duha

tipuak a hrisel lohna boruak chhia siam mai lovin Sorkar zawkin tlang pawng tha deuh zawk atangin Aizawl khawpui hmun tin atang te leh thingtlang khua chhehvel atang te pawhin kumthar a lo thleng ta a ni tih an hriat theihna tur atan te leh kumthar welcome nan tih ni se a tha awm mange aw tih te ngaihtuahna a awm a. Awle, he House zahawm tak atang hian Mizoram mipuite ka'n hrih duh a ni.

Awle, Pu Speaker, hun tha tak min pek avangin lawmthu ka sawi a. Krismas leh kumthar lo thleng turah hian zofate zawng zawng zoram chhung mite ka mizo pui te, Burma ram ami te, Bangladesh ami te leh khawvel hmun hrang hranga awmten hlim leh lawm taka an hman theih ka duh sak a. Tin, kumthar lawmawm tak lo thleng turah pawh hian kum dang zawng aiin Pathian nungin tisa leh thlarau lamah Zoram leh zohnahthlakte a vur kum ni se tiin duhsakna ka hlan a ni. Ka lawm e.

\*Speech not corrected.

**SPEAKER** : Le, tunah chuan Motion neitu Pu Chalrosanga Ralte sawifiah ngaite a neih chuan sawi fiah sela. Chumi zawh chuan Motion hi House-in a pawm a ngai a. House pawmpuina dil nghal turin ka sawm e.

**Pu CHALROSANGA RALTE** : Pu Speaker, ka lawm e. Vawiina House Leader zahawm takin Motion of Thanks pulut tura mawhphurhna min pek avangin a chungah lawmthu ka sawi hmasa leh duh a. Vawiina Motion of Thanks hi member 8-in kan sawi a, sawi kan tlem viau a. Amaherawhchu, tha kan ti tlang anih kan rin avanga sawilo an nih ka ring a, churang

chuan a lawmawm ka ti a. Chuvangin, kan Motion of Thanks putluh min pass-pui turin member-te ka rawn sawm e.

**SPEAKER** : Awle, Pass kha a dik ve tho ang a, House-in a pawm a ngai a, a Motion kha. Chuvangin, tunah hian Pu Chalrosanga'n Governor thusawia lawmthu sawina Motion a rawn putluh hi House-in a pawm a ni tih remti zawngin 'remti' ti rawh u le. Remtilo kan awm em, kan awm lova. He lawmthusawina Motion Pu Chalrosanga rawn putluh hi House-in lungrua takin a pawm a ni tih ka puang e.

Kan Governor zahawm takin MLA zawng zawng hi chibai buk a duh a, hmuh che u a duh a. Khawngaih takin Leader of the House leh Opposition Group Leader te lo inbe rawn ula. A hmuh hun tur leh in thu rel thluk kha kan Parliamentary Affairs Minister-in Governor min hrilh sak mai sela a tha awm mang e ka ti a.

Tunah chuan kan thil tih tur zawng zawng tun tum atan chuan kan lo ti zo ta a, mover-in a sawi tawh ang khan member pariatin thusawina an nei a, kan thusawite atang khian kan rilru alo lang a ni. Rilru hrisek tak atanga chhuak thusawi te kan ngaithla a, a lawmawm hle a. Hetianga lungrua taka opposition leh ruling te pawhin he ram leh hnam hmangaih chungah thusawiin ro kan rel dawn niin a lang a, a lawmawm hle a. In mi lungrua puina avangte, in thuawina avangte, in dawhtheihna avangte hian in zavaia chungah lawmthu ka sawi tak tak a ni. Tichuan kum 2013 Krismas lo awm tur Remna Lal lo piang tur hian member-tinte leh inchhengkaw tin member-te hnenah remna dik tak thlen sela tih ka duh sak em em, chumi duhsakna leh kum 2014 kumthar hlim leh lawm taka

chhungkaw dam tlang taka in hman theuh duhsak chungin tuna kan session hi chu  
tiam chin awm lovin kan titawp rih dawn a ni.

The House is adjourned Sine die.